



歷代史畧

五

リ伊8
1858
5





歷代史略卷之四目錄

近世史上

第一篇 五代

第一章 後梁 附列國及契丹

第二章 後唐 附契丹及列國

第三章 後晉 附遼及閩

第四章 後漢 附遼及楚

第五章 後周

第二篇 宋上

第一章 太祖削平諸國 附遼穆宗遇弒

第二章 太祖諸政

第三章 太宗繼述 附遼耶律

第四章 澶淵之盟及天

休格三敗宋軍

書附李沆之明王旦之悔丁謂之姦

第五章 西夏建國

第六章 仁宗守文附英宗入嗣

第三篇 宋中

第一章 神宗行新法附蘇軾詩

第二章 神宗用兵

第三章 正邪分黨相擠

第四章 徽宗昏德

第五章 遼末諸帝

第四篇 宋下

第一章 金滅遼

第二章 金克宋京

第三章 高宗南渡附金立劉豫又廢之

第四章 金宋講和

第五章 金亮淫虐附高宗內禪

第六章 兩國賢主同世

第七章 宋韓侂胄擅國

第八章 金宋之滅

第五篇 學藝

第一章 北宋儒學

第二章 南宋儒學

第三章 學制科舉及黨禁

第四章 詩文

第六篇 制度

第一章 宋官制

第二章 遼金官制

第三章 宋濫費暴斂

第四章 路府州軍

第五章 貨幣之制

附錄

五代列國世系

宋遼金夏世系

歷代史略 四目錄

二

諸帝在位年數及年號

宋儒傳授圖

文廟從配沿革表

宋遼金職官沿革表

宋百官品秩表

歷代史略卷之四

近世史上

第一篇 五代

第一章

後梁

附列國及契丹

李唐失政國內大亂豪傑割據諸州互相攻伐雖號為藩

鎮勢與列國無異李克用據河東節鎮名領今山西汾州府以北為晉王

李茂貞據鳳翔節鎮名今陝西鳳翔府為岐王朱全忠據河南今河南

東二省為梁王王建據兩川西川東川二鎮今四川省為蜀王楊行密據

淮南節鎮名今江西南江之閒為吳王行密卒子渥代之錢鏐據兩浙

浙西浙東二鎮今浙江省為越王劉仁恭據幽州今直隸順天府王潮據福建

本二州名爲潮卒弟審知代之馬殷據湖南今湖南劉隱據

嶺南今兩廣晉梁最大相讎甚深梁王全忠遂移唐祚稱皇

帝更名晃是爲後梁太祖

諸鎮畏梁之強皆稟其正朔惟晉岐吳蜀猶稱唐年號吳

蜀移檄欲興復唐室卒無應者蜀王建乃遺書於晉請各

帝一方晉王克用復書曰誓於此生靡敢失節建遂自稱

蜀帝

梁太祖以馬殷爲楚王以錢鏐爲吳越王以高季興爲荆

南節度使領荆歸峽等州治荆州今湖北荆州府以王審知爲閩王幽州劉

仁恭爲其子守光所囚太祖以守光爲燕王尋自稱帝嶺

南劉隱卒弟龔代之後稱漢帝是爲南漢吳將張顥徐溫

弒楊渥渥弟隆演立溫又殺顥自領昇州今江蘇江甯府後使養

子知誥入輔吳政

初晉王克用有養子曰存孝驍勇善戰養子存信疾而譖

之存孝懼禍而叛克用討禽之惜其才意臨刑必有爲之

請者諸將疾其能竟無一人言遂殺之又有薛阿檀者亦

勇密與存孝通恐事泄自殺自是晉兵勢淩弱唐末數爲

梁人所攻失數州梁軍圍晉陽縣名太原府治今山西太原府太原縣克用

幾欲走會梁兵以疫還而止克用不能與梁爭者累年憂

形於色子存勗幼警敏有勇略進言曰朱氏窮凶極暴人

怨神怒殆將斃矣吾家世襲忠貞大人當遵養時晦以待其衰奈何輕爲沮喪使羣下失望乎克用悅臨終立爲嗣謂羣臣曰此子志氣遠大必能成吾事克用以唐亡之明年梁太祖開平二年卒存勗襲位年十七

是時梁兵圍晉潞州今山西路安府晉將固守踰年梁築夾寨窘之存勗與諸將謀曰朱溫所憚者先王耳聞吾新立以爲童子必有驕怠之心若簡精兵倍道趨之出其不意破之必矣取威定霸在此一舉不可失也帥師發晉陽伏三垂岡在潞安府潞城縣西南下旦乘大霧直抵夾寨填塹鼓譟而入梁兵大潰南走潞圍遂解晉自是連勝太祖歎曰生子當如

李亞子吾兒豚犬耳亞子者存勗小名也

太祖欲除移鎮

州名成德軍治本恆州今直隸正定府

定州名義武軍治今直隸定州鎮

定叛梁共推晉王存勗爲盟主梁攻鎮州晉王擊其軍於

柏鄉

縣名屬趙州今屬直隸趙州

大破之晉與二鎮兵伐燕太祖自將

救之大敗走還疾劇慙憤曰我經營天下三十年不意太

原

府名河東節度治此謂晉國也

遺藁更昌熾如此吾觀其志不小我死

諸兒非彼敵吾無葬地矣太祖素荒淫常徵諸子婦入侍寵假子友文之妻將立友文爲嗣次子友珪弑之而自立命弟友貞殺友文太祖初居汴州號東都開封府以洛陽爲西都後遷都洛陽在位六年友貞爲東都指揮使起兵

唐史卷四
誅友珪卽位於汴改名瑱晉王伐燕入幽州執劉守光及
仁恭以歸斬之與梁連歲交兵取其數州梁帝聞諸將敗
歎曰吾事去矣

契丹者古東胡遺種也其國在潢河

在直隸省北境內蒙古部內今名西喇木

倫之北本鮮卑舊地後魏初眾稍滋蔓唐時叛服不一分

爲八部各有大人常推一大人建旗鼓以統之唐末約尼

舊作遙輦今遵定諸書改正下放此

欽氏當國爲劉仁恭所攻兵衰民困眾

選耶律安巴堅

舊作阿保機

以代之耶律氏世爲約尼之額爾

奇木

舊作夷離堇

掌部族軍民之政安巴堅勇智善騎射誘八

部大人盡殺之擊并奚霫室韋女眞

古靺鞨一種居室韋之東南今吉林省

諸部以梁貞明二年

朱瑱卽位四年契丹太祖神冊元年

稱帝建元號曰天

皇王是爲太祖號其妻舒嚕

舊作述律

氏曰地皇后后簡重勇

果有權略太祖行兵后常預其謀晉王克用嘗與太祖約

爲兄弟及存勗立以叔父事太祖以叔母事后是時中原

喪亂人多北遷太祖築城邑立市里以處之墾蕪荒田由

是岷庶安業國勢日盛遂城臨潢

在西喇木倫河之北內蒙古巴林旗東北

以爲皇都作孔子廟親謁之始製契丹字頒行之又南略晉

地取代北

代州名今山西直隸州代北謂朔蔚新武媯儒等州今山西大同朔平二府及直隸宣化府地

及平州

今直隸永平府

自此晉之北境殘弊矣

晉王存勗與梁夾河百戰互有勝負時蜀主王建已殂于

衍立吳王楊隆演亦卒弟溥立衍溥以書勸晉王稱帝晉王不許曰先王有遺言當務復唐社稷既而得傳國寶於魏州今直隸大名府將佐皆賀勸進不已初河東監軍張承業故唐宦者也為晉王勸課農桑畜積金穀收市兵馬晉王攻戰連年接應不乏皆承業力承業志在復唐室聞王將稱帝力諫知不可止慟哭曰諸侯血戰本為唐家今王自取之誤老奴矣悒悒成疾而卒王即帝位於魏州改晉為唐奉唐祀是為後唐莊宗追尊父克用曰太祖武帝

太祖養子嗣源勇而有謀莊宗命襲梁鄆州今山東泰安府東平州取之梁驍將王彥章攻拔唐諸寨至楊劉城名今泰安府東阿縣楊劉鎮

力戰不克而還梁軍將攻鄆州莊宗自救之以嗣源為前鋒擊破梁軍禽彥章斬之進逼大梁戰國魏都舊名即梁東都今河南開封府治梁帝朱瑱不知所為聚眾而哭猶慮諸兄弟乘危謀亂盡殺之左右竊傳國寶以迎唐軍瑱命其下殺己在位十一年後梁稱帝二世太祖末帝瑱十有七年而亡

第二章 後唐附契丹及列國

唐莊宗入大梁尋遷都洛陽梁諸藩鎮入朝者皆復其任楚王馬殷吳王楊溥吳越王錢鏐漢主劉龔並遣使朝貢荆南帥高季興自入朝封為南平王岐王李茂貞以地入於唐蜀主王衍昏駸荒縱國亂盜起莊宗遣皇子繼岌與

郭崇韜伐之蜀人爭先款附衍率百官出降蜀亡崇韜薦

孟知祥為西川節度使治成都府今四川首府以鎮之崇韜有智略

佐莊宗成業宦官疾之譖其專權皇后密教繼岌殺之

莊宗幼善音律或時傅粉墨與優人共戲自克梁後驕恣

耽聲色諸伶出入宮掖侮弄縉紳羣臣憤嫉莫敢出氣亦

有反相附託以希恩澤者蠹政害人恣為讒慝帝疏忌宿

將不恤軍士又荒於遊畋蹂踐民稼上下咨怨魏博節鎮名治

魏州今直隸大名府兵戍瓦橋關名故址在直隸保定府雄縣南易水上代歸敕留屯貝

州今直隸廣平府清河縣眾怒作亂奉趙在禮入據鄴都即魏州城今大名府

治帝遣李嗣源討之至城下軍士大譟焚營嗣源叱而問

之對曰將士從主上十年百戰以得天下而主上不恤我

輩初無叛心但畏死耳今欲與城中合勢拔白刃擁嗣源

入城城中不受外兵逆擊之皆潰嗣源詭辭得出欲歸藩

待罪安重誨曰公為元帥不幸為凶人所劫不若星行詣

闕見天子庶可自明嗣源乃趨相州今河南彰德府譖者奏嗣源

已叛嗣源由是疑懼其壻石敬瑭曰安有上將與叛卒入

賊城而佗日得保無恙者乎大梁天下要會願先往取之

則始可自全康義誠曰主上無道軍民怨望公從眾則生

守節必死嗣源乃以敬瑭為前鋒養子從珂為殿引兵而

南帝如關東謂虎牢關東關在河南開封府汜水縣西欲自招撫聞嗣源已據

大梁歎曰吾不濟矣卽命班師有優人爲親軍將者帥兵
攻而弑之在位僅三歲鷹坊人斂樂器覆屍而焚之嗣源
聞之痛哭乃入洛陽百官上牋勸進不許又三請嗣源監
國乃許之繼岌自蜀歸途聞內難自殺嗣源卽位更名亶
是爲明宗

契丹太祖征略托歡

舊作吐谷渾時遺種移居內蒙古西部

党項準布

舊作阻卜

夷種名

等部踰流沙取磧西諸城又伐渤海拔扶餘城

故城在盛

京奉天府開原縣東北

進圍輝罕

舊作忽汗城渤海上京在今吉林省內

其王大謹讓

乞降太祖改渤海爲東丹國冊太子貝

舊作倍

爲人皇王以

主之還至扶餘而崩舒嚕后集諸將難制者謂曰汝思先

帝宜往從之因殺之左右有桀黠者皆送墓所殺之有一
人不肯行曰親近先帝莫如后后往臣請繼之后曰吾非
不欲從先帝顧嗣子幼弱不得往耳乃斷一腕令置墓中
后捨人皇王而立次子德光號嗣聖帝是爲太宗人皇王
失職怏怏遂自東丹浮海奔唐明宗賜姓名李贊華以爲
節度使太宗初立太后決國事立其姪爲皇后其後后族
皆賜姓蕭氏蕭氏之盛比於宗室世預北府宰相之選而
宗室爲南府宰相統契丹一代任國政者惟耶律與蕭二
族而已

唐明宗性不猜忌與物無競卽位之歲年已六旬內無聲

色外無遊畋不任宦官廢內藏庫賞廉吏治賊蠹帝本胡人不知書然所行暗合儒道過舉不至甚兵革罕用較於五代粗為小康在位八年崩子宋王從厚立是為閔帝潞王從珂與石敬瑭少從明宗征伐有功各得眾心從珂鎮鳳翔敬瑭鎮河東及閔帝立執政忌二人欲移其鎮從珂將佐皆謂離鎮必無全理乃拒命移檄鄰道言將入清君側帥兵至陝州名今河南直隸州諸軍迎降閔帝出奔從珂入洛陽宰相馮道帥百官班迎上牋勸進遂即位遣人弑閔帝於衛州今河南衛輝府敬瑭與從珂素不相悅至是不得已入朝鳳翔舊將皆勸

留之時久病骨立從珂不以為虞因得還鎮陰為自全之計敬瑭妻明宗之女也亦辭歸從珂醉曰何不且留欲與石郎反邪敬瑭聞之益懼尋敕移鎮鄆州劉知遠勸敬瑭拒命唐發兵討之敬瑭求救於契丹令桑維翰草表稱臣且請父事之約事捷割地知遠以為太過厚賂金帛足致其兵不必許以土田恐異日大為中國患敬瑭不從契丹太宗得表大喜自將騎五萬赴之敗唐兵於汾曲汾水在山西太原府城西又西南至太原縣城東皆曰汾曲策命敬瑭為晉帝親解衣冠授之是為後晉高祖太宗以高祖南下又破唐兵至潞州而還高祖引兵向洛陽唐將校皆飛狀以迎從珂殺李贊華攜

傳國寶自焚死在位三年後唐四帝莊宗明宗實三姓宗

本姓朱邪氏明宗本無姓氏從珂本王氏凡十四年而亡晉帝入洛陽尋遷都

汴州上契丹帝尊號二十字割燕雲十六州幽薊瀛莫涿檀順新媯儒

武雲寰應朔蔚今直隸順天宣化二府河間府北境及山西大同朔平二府地獻之歲輸帛三十

萬匹契丹以臨潢為上京幽州為南京遼陽府名今盛京奉天府屬州

為東京

唐明宗之世吳王楊溥閩王王璘皆稱帝璘審知之子也

荆南高季興卒子從誨代之楚王馬殷卒子希聲立希聲

卒弟希範立吳越王錢鏐卒子元瓘立西川帥孟知祥併

東川節鎮名治梓州唐以知祥為蜀王閔帝時知祥自稱

帝是為後蜀其歲殂子昶立從珂時閩主璘為其下所弑

子昶立初吳丞相徐溫卒養子知誥專吳政以中書令出

鎮昇州廣金陵城留其子江都縣名揚州治為吳國都今江蘇揚州府治輔政

知誥自為大元帥齊王至後晉初遂受禪奉吳主溥為讓

皇知誥本李氏子自謂唐後國號唐是為南唐尋復姓李

更名昇

第三章 後晉附遼及閩

晉高祖賴契丹得國事之甚謹奉表稱臣謂契丹帝為父

皇帝每北使至即於別殿拜受詔敕歲貢之外慶弔贈獻

相繼於道乃至太后太弟諸王大臣皆有賂遺契丹有所

責讓高祖常卑辭謝之朝野咸以為恥成德節鎮名治鎮州今直隸正定帥安重榮恃勇驕暴每日今世天子兵強馬壯則為之耳執契丹使者上表請伐契丹遂發兵反高祖遣將討斬之函其首以獻契丹

高祖在位六年崩兄子齊王重貴立景延廣用事致書契丹稱孫而不稱臣太宗遣使讓之延廣說重貴囚使者既而遣歸大言曰歸語而主先帝為北朝所立故稱臣奉表今上乃中國所立為鄰稱孫足矣翁怒則來戰孫有十萬橫磨劍足以相待太宗大怒始有南伐之意桑維翰屢請遜辭以謝契丹每為延廣所沮劉知遠鎮河東高祖遺命

召入輔政重貴寢之知遠由是怨晉朝知延廣必致寇而不敢言但益募兵以備契丹

晉開運元年重貴即位二年契丹太宗會同七年太宗伐晉至澶州今直隸大名府

開不克引還所過焚掠晉以劉知遠為行營都統命會兵

山東謂太行山以東知遠不行二年太宗與晉軍戰於定州敗走

重貴既捷心益驕三年下勅北征以杜重威為都招討使太宗引兵圍晉營重威以二十萬眾降遂遣兵取大梁重貴請降桑維翰被殺太宗獲景延廣詰之曰兩主失歡皆汝所為十萬橫磨劍安在延廣伏地請死後自殺

明年遼太宗大同元年太宗入大梁晉百官素服迎之降封重貴

為負義侯徙之黃龍府府渤海扶餘城也晉諸藩鎮皆附契丹太宗行入閣禮建國號曰遼改元大同以恆州即鎮州

為中京廣受四方貢獻縱酒作樂縱胡騎四出剽掠謂之打草穀郊畿數十里閒財畜殆盡太宗謂判三司劉昫曰

契丹兵應有優賜速宜營辦時府庫空竭昫括借都城士民錢帛又分遣使者詣諸州括借皆迫以嚴誅人不聊生

其實無所頒給皆欲輦歸由是內外怨憤皆思逐之所在盜起太宗曰不知中國難制如此居汴僅三月置鎮而還

途得疾崩於欒城縣名屬恆州今屬直隸正定府時舒嚕太后及太弟魯呼舊作李胡皇子璟皆留臨潢唯人皇王之子阮在軍中大臣

奉立之是為世宗太后怒遣魯呼帥師拒之敗還世宗入上京幽太后及魯呼於祖州在臨潢西南今內蒙古巴林旗之北追尊父貝

為帝晉高祖時閩主王昶昏虐叔父曦弑之而自立曦亦虐與弟延政相攻重貴之世延政稱殷帝於建州今福建建甯府閩將

朱文進弑曦而自立延政討之閩人誅文進傳首於殷殷改號閩南唐主李璟遣將攻拔建州延政出降閩亡唐兵

攻福州今福建福州府吳越王錢弘佐遣兵救之敗唐兵遂取福州璟昇之子弘佐元瓘之子也

第四章 後漢附遼及楚

遼太宗之在汴也河東節度使劉知遠遣使奉表稱臣或勸舉兵進取知遠曰契丹所利止於財貨財貨既足必將北去宜待其去然後取之郭威楊邠等勸稱尊號知遠從之及太宗崩乃發太原入洛遼將多棄城遁遂入汴知遠本沙陀突厥別種人自以姓劉稱漢家之裔國號曰漢後更名漢乾祐元年遼世宗天祿二年崩皇子承祐立是爲隱帝楊邠郭威史弘肇受顧命輔政威專主征伐出平叛藩務施威惠士眾歸心尋鎮鄴都以備遼初高祖留弟崇鎮河東崇與威有隙及威執政陰爲自全之計選募勇士繕脩甲兵罷上供財賦詔令多不稟承

隱帝左右嬖倖濫用事楊邠等屢裁抑之嘗議事於前曰陛下但禁聲有臣等在帝益壯積不能平左右因譖之帝遂殺邠弘肇等遣密詔欲殺郭威於鄴將佐勸威入朝自訴威引大軍至帝遣兵拒之或降或不戰而還帝爲亂兵所殺在位三年威白太后迎武甯節度使治徐州今江蘇徐州府贊欲立之贊崇之子也會遼世宗伐漢太后遣威將兵禦之威至澶州將士大譟裂黃旗被威體以擬天子袍共扶抱之呼萬歲震地擁威南還威以太后詔廢贊爲湘陰公自爲監國遂代漢爲帝自謂周文王弟號叔之後建國號曰周是爲後周太祖漢主中原僅二世高祖隱帝不滿四年

劉崇初聞隱帝遇害欲起兵南向聞迎立贊則曰吾兒為

帝吾又何求贊廢死崇乃稱漢帝是為世祖史謂之北漢

所有者山西十州并汾嵐石遼沁忻代麟而已崇嘗謂諸

將曰我是何天子汝曹是何節度使邪遣皇子鈞伐周不

克遣使於遼稱姪乞師遼世宗冊世祖為神武皇帝自將

救漢諸部不欲世宗強之行至歸化州本唐媯州今太祖直隸宣化府

之姪察割作亂弑世宗自立太宗子壽安王璟誅察割而

即位是為穆宗世祖以叔父事之請兵以伐周復不克

漢初楚王馬希範卒將佐捨長弟希萼而立少弟希廣自

是兄弟相攻聞隱帝末年希萼殺希廣而立稱臣於南唐

周初其下又逐希萼而立其弟希崇唐主李璟遣將擊之

希崇迎降楚亡後楚舊將劉言等逐唐人復取湖南而附

於周

第五章 後周

周太祖恭儉增脩國政在位三年崩無子嘗養妻兄子柴

榮為子封晉王至是即位是為世宗漢世祖聞周祖死甚

喜乞師於遼遼穆宗遣從弟達魯舊作敵祿將萬騎世祖自將

兵三萬共伐周世宗自將禦之世祖軍於高平縣名屬澤州府

世宗趣諸將亟進合戰未幾右軍將遁走步兵千餘

解甲降漢世宗見軍勢危親犯矢石督戰宿衛將趙匡胤

曰主危如此吾屬何得不致死與趙承德各將二千人進戰匡胤身先士卒馳犯敵鋒士卒死戰無不一當百漢軍大敗達魯不敢救世祖晝夜北走僅得入晉陽世宗收將吏先遁者七十餘人責之曰汝輩非不能戰正欲以朕爲奇貨賣與劉崇耳悉斬之自是驕將惰卒始知所懼承德盛稱匡胤智勇擢爲殿前都虞侯世宗復攻漢抵晉陽而還世祖憂憤成疾而崩子鈞監國告哀於遼穆宗冊鈞爲漢帝是爲孝和帝

初周宿衛之士承累朝姑息之後驕蹇不用命且羸老居多世宗曰兵務精不務多今以農夫百未能養甲士一奈何浚民之膏血養此無用之物乎乃命大簡諸軍又詔募諸道壯士命趙匡胤選其尤者爲殿前諸班其騎步諸軍各命將帥選之由是士卒精強所向克捷

周顯德二年遼穆宗應歷五年遣將伐蜀取秦階二州皆今甘肅直隸州成

今階州屬縣鳳今陝西漢中府屬縣四州三年世宗自將伐南唐大敗其

兵於正陽淮津名在安徽鳳陽府壽州城西命趙匡胤襲滁州今安徽直隸州克

之帝還大梁留兵圍壽州今鳳陽府屬州四年帝自將攻壽破唐

援兵於紫金山在壽州城東北壽州人以城降又攻濠州今鳳陽府屬州泗

州名今安徽直隸州降之遣兵取揚州名今江蘇州府屬州五年帝

克楚州今江蘇淮安府臨江遣水軍擊破唐兵唐主李璟奉表獻

江北地謂廬舒蕪黃等州今安徽廬州安慶二府及湖北黃州府地帝乃引還璟避周

諱更名景去帝號奉周正朔六年帝自將伐遼取瀛今直隸河

間府莫今河間府任邱縣易州今直隸省直隸州關南謂瓦橋關南悉入於周

遂趨幽州會不豫而止以瓦橋關為雄州益津關為霸州

今直隸順天府屬州置戍而還往還僅兩月

初世宗在藩多務韜晦及即位破高平之寇人始服其英

武號令嚴明將士莫敢犯應機決策出人意表又勤於政

事發姦摘伏用法甚嚴性不好絲竹珍玩之物常曰朕必

不因喜賞人因怒刑人文武參用各盡其能人畏其明而

懷其惠故能破敵廣地所向無前在位六年崩崩之日遠

邇哀慕子梁王宗訓立年七歲是為恭帝

趙匡胤從世宗征伐洊立大功士卒服其恩威遷殿前都

點檢及恭帝立加檢校太尉領歸德軍節度使治宋州今河南歸德府

會漢遼會師伐周詔匡胤率兵禦之夕次陳橋驛在河南開

封府城時主少國疑軍士聚謀曰先立點檢為天子然後

北征匡胤弟光義及歸德掌書記趙普部分都將環列待

旦馳使入京報宿衛將石守信王審琦二人素歸心匡胤

者黎明將士逼匡胤寢所露刃列庭曰諸將無主願冊太

尉為皇帝即被以黃袍羅拜呼萬歲擁上馬南行匡胤攬

轡誓諸將肅隊入汴周將相皆降獨侍衛副將韓通死節

恭帝禪位時周顯德七年也匡胤稱帝奉恭帝為鄭王以所領歸德軍在宋州建國號曰宋是為宋太祖或稱藝祖周三帝太祖世宗恭帝九年而亡

自唐亡以來僅五十三年而更十有三君五易國而八姓

唐莊宗明宗從珂周太祖世宗各為一姓與朱梁石晉劉漢而八梁起於盜賊後唐晉漢

出於胡族契丹以夷裔陵諸夏羣雄竊據方隅者前後十

二國燕岐前蜀後蜀楚荆南吳南唐吳越閩南漢北漢四海濁亂人不復知節義

為何物觀馮道一傳則可以概見當時士風也道初事劉

守光去仕唐莊宗始貴顯至周世宗世卒歷事五朝後唐晉遼

漢八姓十一君後唐四帝晉二帝遼常不離將相公師之

位國存則依違保祿位國亡則圖全苟免雖興亡接踵富貴自如嘗著長樂老敘自述累朝榮遇之狀時人皆以為寬弘長者蓋五季之亂民命倒懸而道頗以救濟為念公正處事以故遐邇傾服若夫反面事敵則既為士夫常事世莫復訝之者甚至以此無恥之人而以德量見推名教之廢至是而極矣

歷代史略卷四
唐本紀四
五

第二篇 宋上

第一章 太祖削平諸國 附遼穆宗遇弒

宋太祖移周祚改元建隆周諸藩鎮皆服屬獨昭義節度

使 治潞州今山西潞安府 李筠不從起兵會北漢伐宋太祖遣石守

信等擊之尋自將圍筠於澤州 屬昭義軍今山西澤州府 筠自焚死淮

南節度使李重進周祖之甥也謀起兵拒宋太祖自將擊

之重進亦自焚死南唐吳越皆遣使賀即位太祖授吳越

王錢俶大元帥建隆三年 遼穆宗應唐主李景懼宋逼遷

都南昌 府名南唐南都今江西首府 以太子煜守金陵 南唐國都南朝建康唐昇州治

今江蘇江甯府治 景殂煜立於金陵奉父遺表願追尊帝號太祖

歷代史略卷四
七

許之

周初劉言王逵等據湖南周祖使言鎮朗州今湖南常德府逵鎮

潭州今湖南長沙府既而逵襲殺言而取朗令周行逢鎮潭世宗

時逵為其下所殺將吏迎行逢入於朗至是行逢卒于保

權嗣其將張文表作亂襲潭據之保權表請援於宋乾德

元年太祖即位四年太祖遣慕容延釗等擊文表假道荆南因襲

江陵府名荆南節度治今湖北荊州府節度使高繼沖出降荆南亡時文

表已敗死而宋師繼進不止取潭州將趨於朗保權懼而

拒守延釗擊破之獲保權湖南亡二年遣王全斌等擊蜀

明年克之蜀主孟昶出降後蜀亡賜昶爵秦公

開寶元年太祖九年漢孝和帝崩養子繼恩立司空郭無為弑

之而立其弟繼元皆孝和之甥也太祖遣李繼勳擊之繼

元乞師於遼遼穆宗遣將救之繼勳引還穆宗耽酒荒於

畋獵嗜殺不已刑政紊亂上下怨之二年遼應曆十九年畋於懷

州在臨潢西南今內蒙古巴林旗界內為近臣所弑世宗之子賢馳赴懷州

即位是為景宗太祖自將擊漢圍太原景宗復遣援太祖

不能克會暑雨軍士多疾盡棄糧儲而還三年遼景宗保寧二年

遣潘美擊南漢明年克廣州南漢國都今廣東廣州府漢主劉鋹降

唐末以來安南不從朝命部人割據宋初驩州故城在安南國又安

南府西刺史丁部領擊并諸州自立號大勝王尋遜位其子

璉及南漢亡璉入貢於宋封交阯郡王自是交阯即安南遂
爲外國唐主李煜聞南漢亡懼甚自貶國號曰江南太祖
欲伐之而無名乃遣使諭其入朝煜稱疾不至七年命曹
彬潘美等擊之誠曰切勿暴掠生民務廣威信使自歸順
不須急擊以劍授彬曰副將而下不用命者斬之美以下
皆失色自王全斌平蜀多殺降人帝每恨之彬性仁厚故
專任之

八年彬進圍金陵李煜遣徐鉉求緩師言於帝曰煜以小
事大如子事父未有罪過奈何見伐帝曰爾謂父子爲兩
家可乎鉉不能對而還尋復至見帝論辨不已帝怒按劍
曰不須多言江南亦有何罪但天下一家臥榻之側豈容
他人鼾睡乎鉉惶恐辭歸

金陵受圍十月勢愈危迫彬終欲降之遣人告煜曰某日
城必破宜早爲之所煜不聽一日彬忽稱疾諸將來問彬
曰余疾非藥能愈惟須諸君誠心自誓破城不妄殺一人
則自愈矣諸將許諾共焚香爲誓翌日城陷煜出降江南
平捷書至帝泣曰宇縣分割民受其禍攻城之際必有橫
罹鋒刃者可哀也出米十萬斛賑卹之

第二章 太祖諸政

太祖受禪將相羣司皆用周朝人惟趙普以軍府舊僚專

預密議石守信王審琦等皆帝故人有功典禁衛兵普數以爲言帝曰彼等必不吾叛普曰然數人者皆非統御才恐不能制伏其下帝悟一日因宴諭守信等釋去兵權皆以爲節度使

帝嘗問普曰吾欲息天下兵爲國家長久計其道何如對曰唐季以來帝王數易由方鎮太重君弱臣強而已今欲治之宜稍奪其權制其錢穀收其精兵則天下自安矣帝從其謀以漸削諸鎮之權或因其卒或因遷徙致仕以文臣代之知州軍事又令鎮府所領支郡皆直隸京師設通判俸貳郡政凡兵民之政皆與郡守通簽別置轉運使掌

各路之財賦又選諸州驍勇入補禁旅立更戍法分遣禁旅戍守邊城自是五代武斷之弊始革生民蘇息而兵勢之弱亦胚胎於此云

帝一夕冒大雪微行至普第計下太原普曰太原當西北二邊太原旣下則邊患我獨當之不如姑俟削平諸國帝曰吾意正如此特試卿耳又嘗以幽燕地圖示普問進取之策普曰圖必出曹翰翰能取之孰可守帝曰以翰守之普曰翰死孰可代帝默然良久曰卿可謂深慮矣於是專用力於南方不復言伐燕

普沈毅有謀略帝甚任之舊相范質等三人皆求避位帝

從之以普同平章事普嘗薦某人爲某官帝不許再三奏之帝怒裂其奏普徐拾以歸補綴以進帝悟卒用其人又有朝臣當遷官帝素嫌其人不與普力請帝怒曰朕固不與奈何普曰刑賞天下之刑賞安得以喜怒專之帝怒甚起入宮普隨之立宮門不去竟得俞允其剛直如此然性多忌克嘗以私怨誣人論死獨相九年爲政頗專又好貨利有不法事爲人告訐帝始疑普詔參知政事與普更奏事以分其權普不自安乞罷政出爲節度使

帝注意刑辟命判大理寺竇儀重定刑統頒行之嘗歎近世法網之密定折杖法以減流徒杖笞之刑犯大辟者令諸州錄案聞奏付刑部詳覆之非情理深害者多從寬恤惟重貪墨之罪賊吏必誅未嘗少贲蓋帝親見五代時貪吏恣橫民不聊生故以嚴法治之欲塞濁亂之源也

帝削平諸國君長降者皆不加戮禮而存之其族黨皆見錄用嘗幸武成王廟觀從祀有白起像指曰起殺已降不武之甚命去之江南已平吳越王錢俶自入朝賞賚極厚俶還賜以黃袱封緘甚固戒曰途中宜密觀啟之則羣臣乞留俶章疏也俶愈感懼至太宗世俶上表獻其地封爲淮海王於是五代列國皆入於宋未服者惟北漢而已太宗自將擊之圍太原劉繼元出降賜爵彭城公當是時諸

降王皆賜第京師得保富貴子弟舊臣分職州郡掌兵民之權而朝廷無所猜防太祖太宗度量之大可以觀也劉宋以來受禪之君無能存前代之後者獨周世宗之裔世受尊爵延至宋末亦宋人之厚也

第三章

太宗繼述

附遼耶律休格三敗宋軍

太祖母昭憲杜太后臨崩召趙普入受遺命且問太祖曰汝知所以得天下乎太祖曰皆祖考及太后之餘慶后曰不然正由周世宗使幼兒主天下爾汝百歲後當傳位光義光義傳光美光美傳德昭國有長君社稷之福也太祖泣曰敢不如教后命普爲誓書普署紙尾曰臣普記藏之

金匱光義光美皆太祖母弟德昭太祖長子也

太祖友愛光義數幸其第恩禮甚厚爲開封尹封晉王每言光義龍行虎步他日必爲太平天子福德非吾所及也嘗幸洛陽有布衣張齊賢獻十策太祖善其四策齊賢堅稱餘策皆善太祖怒斥之還語晉王曰吾幸西都得一張齊賢吾不欲用之異日可使輔汝爲相也據此言則傳位之約已定也太祖在位十七年崩晉王立更名昺是爲太宗或曰上不豫夜召晉王屬以後事左右皆不得聞但遙見燭影下王時離席有遜避之狀旣而上引柱斧戳地大聲言好爲之遂崩然實錄正史皆不記如有所諱故世或

疑太祖不令終也

太祖末年遼景宗遣使通好太祖遣使報之太宗既滅漢

欲乘勝取幽薊薊州今直隸順天府屬州自太原直東擊遼進圍南京

景宗遣耶律休格舊作耶律休哥救之大敗宋軍於高粱河在今京城

西太宗走還自是遼宋之好絕明年太宗太平興國五年遼景宗乾亨二年

景宗自將擊宋圍瓦橋關休格渡水擊走宋兵太宗自將

至大名府名唐魏州今直隸大名府聞遼軍引去乃還議者皆言宜速

取幽薊張齊賢上疏曰自古疆場之難非盡由戎狄亦多

邊吏擾而致之若緣邊諸軍撫御得人畜力養銳以逸自

處則邊鄙甯而河北之民獲休息矣

太宗圍燕之役武功王德昭從行軍中嘗夜驚不知帝所

在有謀立德昭者帝聞不悅及歸以北伐不利久不行平

漢之賞德昭言之帝大怒曰待汝自爲之賞未晚也德昭

退而自刎後二年德昭弟德芳卒秦王廷美即光美自二姪

相繼沒始不自安或告其有陰謀帝疑以問趙普普因言

願備樞軸以察姦變由此復相既而帝以太后遺旨訪之

普曰太祖已誤陛下豈容再誤廷美遂得罪勒歸私第普

又諷知開封府李符告其怨望貶爲縣公安置房州今湖北鄖

府以憂卒普開國元勳羣臣莫與比肩然其佐太宗無相

業可觀

遼景宗在位十四年崩長子梁王隆緒立是爲聖宗年甫
十二承天太后奉遺詔攝政以耶律休格總南面軍務后
明達治道聞善必從又習知軍政賞罰信明將士用命聖
宗稱遼盛主后教訓爲多雍熙三年太宗卽位十一年太
宗遣曹彬等分道伐遼取數州休格出禦之承天太后與
聖宗將大軍應援彬兵引退休格追戰於岐溝關在直隸
涿州西南大敗之休格智略宏遠料敵如神每戰勝讓功諸將
鎮燕十七年勸農桑省賦役恤孤寡平時戒戍兵無犯宋
境雖馬牛來逸者悉還之軍民懷之邊疆大治太宗之不
得志於燕以有休格也

第四章

澶淵之盟及天書

附李沆之明王旦之悔丁謂之姦

太宗在位二十一年崩太子恆立是爲眞宗景德元年

眞宗

七年遼統和二十二年

遼聖宗奉承天太后伐宋深入內地宋人震

駭參政王欽若江南人請幸金陵陳堯叟蜀人請幸成都

眞宗以問宰相寇準準曰誰畫此策帝曰卿姑斷可否勿

問其人準曰臣欲得獻策之臣斬以釁鼓然後北伐耳遂

定親征之議恐欽若沮議出判天雄軍

卽大名府屬河北路今直隸大名府

命朝士出知諸州皆於殿前受勅準戒曰百姓皆兵府庫

皆財不責汝浪戰但失一城一壁當以軍法從事遼軍進

圍澶州

今大名府開州

太后親御戎車督戰李繼隆出禦之遼統

軍蕭達蘭

舊作蕭捷凜

中弩死欽若在大名閉門束手無策脩

齋誦經而已真宗至澶州南城

在開州城南

眾請駐蹕準力勸

渡河殿前帥高瓊亦固請即麾衛士進輦遂渡河御北城

今開州城

門樓宋軍望見御蓋踴躍呼萬歲聲聞數里遼人駭

怖

先是宋將王繼忠降在遼遺書於宋勸和真宗因遣曹利用詣遼軍議和太后欲得周世宗所取關南地遣使持書與利用偕來真宗曰地不可許甯與金帛準欲邀其稱臣及獻幽薊之地因畫策以進曰如此則可保百年無事不然數十年後戎且生心矣帝曰數十年後當有能禦之者

吾不忍生靈重困姑聽其和可也乃復遣利用往利用請歲幣之數帝曰必不得已雖百萬亦可準召語之曰雖有敕旨汝所許過三十萬吾斬汝矣利用竟以銀十萬兩絹二十萬匹定和議南朝為兄北朝為弟交誓約各解兵歸寇準自澶州還頗矜其功真宗待之甚厚王欽若深嫉之一日會朝準先退帝目送之欽若進曰陛下敬準為其有社稷功耶城下之盟春秋小國所恥也帝愀然不悅欽若曰陛下聞博乎博者輸錢欲盡乃罄所有出之謂之孤注澶淵唐故郡名即澶州之役準以陛下為孤注帝顧準寢衰竟罷相王旦代之旦深沈有德望帝深屬心

帝自聞王欽若言深以澶淵之盟爲辱欽若知帝厭兵謬
日以兵取幽薊可滌此恥帝令思其次欽若曰惟封禪可
以鎮服四海誇示外國然封禪者得天瑞然後可行前代
蓋有以人力爲之河圖洛書果有此耶聖人以神道設教
耳帝患王旦不可欽若乘間爲旦言之帝賜旦樽酒歸發
封則皆美珠也旦悟帝旨自是不敢有異議帝密作帛書
置之屋上稱天書降百官拜賀作玉清昭應宮以奉天書
遂封泰山禪社首山名在山東泰安府城西南祭后土於汾陰故城在山西蒲州府榮河縣北羣臣爭言祥瑞頌功德上帝尊號帝又言趙氏祖
司命天尊受玉皇命自天降臨作景靈宮以奉聖祖諸州

天慶觀並增建聖祖殿

真宗在位二十六年在相位者前後十餘人李沆最賢當
沆爲相時王旦甫參政沆日取四方水旱盜賊奏之旦謂
細事不足煩上聽沆曰人主少年當使知人間疾苦不然
血氣方剛不留意聲色犬馬則土木甲兵禱祠之事作矣
吾老不及見此參政他日之憂也丁謂機敏有智謀寇準
屢薦之沆不用曰願其爲人可使之在人上乎準曰如謂
者相公終能抑之使在人下乎沆笑曰他日當思吾言沆
卒後數年封禪祠祀營建並興旦乃歎曰李文靖真聖人
也每有大禮旦輒以首相奉天書以行常悒悒不樂欲去

則帝遇之厚及卒遺令削髮披緇以斂蓋悔其不諫天書也

且罷王欽若相欽若罷寇準再相以丁謂參政謂事準甚謹嘗會食羹污準鬚謂起拂之準笑曰參政國之大臣乃為官長拂鬚耶謂大慙恨遂譖準罷其政李迪與謂並相時帝有疾昏眩謂白中宮竄準遠州迪罷謂獨相弄權專恣眾莫敢抗獨參政王曾正色立朝時倚為重帝崩太子禎立是為仁宗年十三章獻明肅劉太后垂簾聽政謂以營山陵不謹免王曾代之竄謂遠州曾為相所進退士莫有知者范仲淹謂之曰明揚士類宰相任也公之盛德獨

少此爾曾曰恩欲歸已怨使誰當仲淹服其言

第五章 西夏建國

唐末党項拓跋思恭起兵討黃巢以功授定難軍節度使

治夏州故城在陝西榆林府懷遠縣西內蒙古鄂爾多斯界內賜姓李氏子孫世襲

其職臣事五代數傳至繼捧率其族朝宋獻境內四州銀

綏省繼捧族弟繼遷走入地斤澤在夏州故城東北聚眾襲銀州今陝

西綏德州米脂縣據之降於遼聖宗以為定難節度使以宗女妻

之尋封夏王繼遷數侵宋邊趙普白太宗復以繼捧鎮夏

州賜姓名趙保忠使圖繼遷繼遷奉表謝罪已而復叛太

宗命李繼隆討之時保忠亦已附遼繼隆入夏州執保忠

送汴繼遷叛服不常繼隆等擊之不克真宗初立拜繼遷

節度使以五州

夏綏銀宥靜

與之後復叛攻陷靈州

唐靈武郡今甘肅甯

夏府

又攻西蕃取西涼

府名今甘肅涼州府

六谷

地名在涼州府境內

酋長潘

羅支偽降襲敗之繼遷中流矢走死其子德明嗣

德明歸款於宋真宗厚賜以羈縻之遼又冊為夏王德明

臣事兩朝然於本國則稱帝立其子元昊為太子元昊雄

毅多大略數諫其父勿臣宋德明日吾族三十年衣錦綺

此宋恩也不可負元昊曰衣皮毛事畜牧國俗所便英雄

之生當霸王耳何錦綺為

德明卒於仁宗明道元年

仁宗即位十年遼興宗重熙元年

元昊嗣立修

明號令以兵法勒諸部置文武官立蕃漢學自製蕃書以

教國人擊回鶻盡取河西地據有十八州

夏銀綏宥靜靈

沙肅洪定威龍今陝甘北境及內蒙古西南部

都興慶

府名今甘肅甯夏府

阻河依賀蘭山

為固自號大夏皇帝遺書於宋邀其冊命且請續鄰好仁

宗詔削其官爵絕互市自是連年侵寇西邊騷然

第六章

仁宗守文

附英宗入嗣

章獻太后稱制十一年崩仁宗始親政時王曾已罷相李

迪呂夷簡並相仁宗寵尚美人因廢郭后夷簡有憾於后

贊其議臺諫孔道輔范仲淹等爭之夷簡奏謫之李迪罷

王曾復相而權在夷簡仲淹遷知開封府言事愈急數議

時政夷簡訴其越權復貶謫館閣余靖尹洙爭之皆坐貶
歐陽修責司諫高若訥不諫言不知人間有羞恥事若訥
怒上其書脩亦貶蔡襄作四賢一不肖詩以譽仲淹靖洙
脩而毀若訥都人傳誦鬻書者得厚利王曾求罷帝問其
故曾因斥夷簡納賂二人俱罷

李元昊攻延州

屬陝西路今陝西延安府

邊將劉平石元孫戰沒知延

州范雍閉門不救坐貶時軍興多事首相張士遜無所補

諫官以爲言士遜致仕呂夷簡復相以夏竦經略陝西

名路

今陝甘之大半及河南陝州山西解州蒲州府韓琦范仲淹副之仲淹兼知延州

夏人相戒曰毋以延州爲意小范老子胸中自有數萬甲

兵不比大范老子可欺也大范指雍也竦無功而免琦仲
淹專膺邊任推誠撫綏諸羌服其恩威邊人爲之謠曰軍
中有一韓西賊聞之心膽寒軍中有一范西賊聞之驚破
膽元昊之不得大逞藉二人宣力居多

宋朝民殷國富數倍契丹而武力或不及之遼興宗乘未

有西夏之撓欲取關南地慶曆二年

仁宗二十年遼重熙十一年

遣使

求之且責宋脩邊備聚兵於燕聲言南下仁宗不欲與地
欲增歲賂或結婚以和擇報聘者呂夷簡不悅富弼因薦
之夷簡奏建大名爲北京示將親征弼至遼反覆論難力
拒其割地且辨和戰之利害弼還復持國書往且受口傳

之辭於政府途謂副使曰吾不見國書脫書辭與口傳異
吾事敗矣啟視果不同馳還白之易書而行增歲幣銀絹
各十萬互致誓書自是通好如故

宋夏用兵日久仁宗心厭之元昊上書請和呼帝爲父更
名曩霄而不稱臣尋上誓表乞歲賜銀綺絹茶二十五萬
仁宗許之會遼夏釁起興宗遣使請無與夏和及聞遼夏
平乃冊元昊爲夏國主約稱臣奉正朔而元昊帝其國自
若宋致歲幣二國於夏則曰賜於遼則曰納
仁宗增置諫官以歐陽脩王素蔡襄余靖爲之脩等論事
切直小人不便帝召夏竦爲樞密使韓琦范仲淹爲副使

諫官論竦罷之以杜衍代之國子直講石介喜曰此盛事
也乃作慶厯盛德詩有曰眾賢之進如茅斯拔大姦之去
如距斯脫大姦蓋指竦也仲淹得詩拊股謂琦曰爲此鬼
怪輩壞事羣邪造論目衍等爲黨人脩乃作朋黨論上之
以爲人君當退小人之僞朋而進君子之眞朋也

時呂夷簡已罷章得象晏殊並相范仲淹遷參政富弼爲
樞副帝方銳意求治數召輔臣條對仲淹才兼文武有大
節常曰士當先天下之憂而憂後天下之樂而樂於是與
弼日夜謀慮欲革弊政而謗毀愈盛不自安於朝皆請出
按西北邊晏殊罷杜衍代之衍務裁僥倖每有內降率腹

格不行積詔旨至十數輒納帝前帝嘗語歐陽脩曰外人知杜衍封還內降邪凡有求於朕每以不可告而止者多於所封還也會衍壻蘇舜欽有過失御史中丞王拱辰欲傾衍等因劾舜欽得罪者十餘人拱辰喜曰吾一網打盡矣衍與仲淹弼並罷韓琦亦請外皆出知州

衍去後相繼爲相者率無偉績帝嘗問相於王素素曰惟宦官宮妾不知姓名者可充其選帝曰如是則富弼爾遂召弼與文彥博並相士大夫相慶於朝帝語歐陽脩曰古之命相或得諸夢卜今朕用二相豈不賢於夢卜哉其後彥博以老求罷韓琦爲相富弼以母喪去位曾公亮相歐

陽脩參政琦位首相法令典故問公亮文學之事問脩三人同心輔政百官奉法循理朝廷稱治仁宗在位四十二年恭儉愛民終始不變慶厯以後賢者滿朝國內承平少事進士諸科得名臣之多超絕古今然吏治偷惰兵備不振宋之威德卒不能及漢唐盛時

仁宗無子養太宗曾孫宗實爲皇子賜名曙仁宗崩慈聖光獻曹后召曙入立之曙固避數四而後嗣位是爲英宗英宗有疾皇太后權同聽政英宗舉措或改常度遇宦官尤少恩左右多不悅內侍任守忠等共爲讒閒兩宮遂成隙韓琦歐陽脩等委曲調護及英宗疾瘳始親政太后撤

簾諫官司馬光呂誨論守忠罪韓琦坐政事堂召守忠立
庭下曰汝罪當死責竄之

英宗父允讓卒於仁宗時追封濮王及英宗立韓琦請議
崇奉典禮司馬光立議曰爲人後者爲之子不得顧私親
翰林學士王珪等又議曰濮王宜稱皇伯歐陽脩駁之曰
喪服大記曰爲人後者爲其父母降服而不沒父母之名
以見服可降而名不可沒也議久不定侍御史呂誨范純
仁監察御史呂大防等固執珪議遂劾執政至乞皆貶黜
執政以太后詔令帝稱濮王爲親誨等皆辭臺職光亦請
與俱貶不許英宗在位四年崩太子頊立是爲神宗自濮
議以來論者妄詆琦脩等脩遂請罷

第三篇 宋中

第一章 神宗行新法

神宗少有雄心欲大攘四夷恢張先烈以爲養兵奮武不可不先聚財而環顧朝臣皆習故守常莫有能任其事者素聞王安石之名以問輔臣曾公亮曰眞輔相才參政吳奎曰安石護非自用所爲迂闊萬一用之必紊綱紀公亮力薦之韓琦求去帝曰卿去誰可屬國者王安石何如琦曰安石居翰林則有餘處輔弼之地則不可

安石博學善屬文歐陽脩嘗爲之延譽擢進士上第仁宗召爲度支判官安石議論高奇能以辨博濟其說慨然有

矯世變俗之志嘗上萬言書痛論時政每遷官遜避不已及除知制誥則不復辭嘗侍釣魚宴誤食鉤餌已悟而食之仁宗以其不情惡之安石有重名士爭納交惟蘇洵不見著辨姦論以毀之英宗之世退居不出至是召爲翰林學士熙甯元年遼道宗咸雍四年人對首以擇術爲言言必稱堯舜神宗語之曰魏徵諸葛亮誠不世出之人也安石曰陛下誠能爲堯舜則必有皋夔稷契彼二子者何足道哉富弼自汝州屬京西路今河南直隸州入覲帝問以邊事弼窺見帝喜事功對曰陛下臨御未久當布德惠願二十年口不言兵帝默然然以弼有德望召爲相以安石參政

安石既入政府士大夫多以爲得人時呂誨爲御史中丞將入對學士司馬光亦將詣經筵相遇並行光密問今日所言何事誨曰襄中彈文乃新參也光愕然曰眾喜得人奈何彈之誨曰君實亦爲此言邪安石執偏見喜人佞已天下必受其弊上疏言大姦似忠大詐似信安石外示朴野中藏巧詐驕蹇慢上陰賊害物帝還其章疏誨乃辭職安石視時人所爲斥爲流俗別思創建非常超軼前代神宗適如所願傾心納之安石論事多引用周官爲據建議言周置泉府之官以變通天下之財後世惟桑弘羊劉晏粗合此意今當脩泉府之法以收利權乃立制置三司條例

司掌經畫邦計議行新法安石實不曉世務每事與呂惠卿謀凡所建請章奏多惠卿筆也人號安石爲孔子惠卿爲顏子於是遣八使察農田水利賦役以求遺利置賣鹽場於永興軍卽京兆府陝西路治今陝西西安府行均輸法於淮浙江湖六路淮南兩浙江南東西荆湖南北

初陝西轉運使李參以部內多戍兵而糧儲不足貸民以錢令出息二分春散秋斂號青苗錢安石欲行之諸路以爲周官國服爲息法也條例司官屬蘇轍蘇洵次子謂安石曰以錢貸民吏緣爲姦錢入民手雖良民不免妄用及其納錢雖富民不免違限如此則鞭箠必用州縣不勝煩矣安

石不從遂行青苗法以廣惠倉錢穀充其本錢置各路提舉官以掌之諸路往往以多散爲功隨戶等高下品配又恐其逋負必令貧富相保抑配倍克至與詔旨相違

蘇轍及諫官范純仁范仲淹子侍御史劉述等皆以論事忤安

石罷參政唐介與安石爭辨不勝其憤疽發背卒時人有生老病死苦之喻謂安石爲生曾公亮爲老唐介死富弼議論不合稱病參政趙抃無如安石何惟稱苦苦而已安石折抃曰君輩坐不讀書耳抃曰皋夔稷契何書可讀安石亦不能對弼遂去位陳升之相公亮罷升之亦罷安石相

凡安石所行新法青苗最為深害其他保甲募役市易保馬方田均稅免行錢諸役相繼並興其法雖未必皆惡行之不得其人且以違祖法乖民情故上下不便怨議紛起安石嘗謂天變不足畏人言不足恤時人皆以為慢天悖經帝嘗親策試進士葉祖洽等三百人及第祖洽詆祖宗而美新政故得擢第一直史館蘇軾蘇洵長子慨之擬對策論新法獻之又上萬言書極論其害因貶帝又親策賢良呂陶孔文仲力詆新法皆報罷翰林學士范鎮嘗薦蘇軾孔文仲且數忤安石致仕是時在朝名士如文彥博呂公弼呂公著二人皆呂夷簡子張方平孫覺程顥韓維李常蘇頌劉摯

等以議新法貶黜或自求去者前後相繼外官亦多以沮格新法得罪者京城置邏卒以察謗時政者

帝嘗問司馬光曰安石何如光曰人言安石姦邪則毀之太過但不曉事又執拗耳光數貽書諫安石安石忌之帝以光為樞密副使力辭不拜反覆論新法之害遂請外知永興軍上言臣之不才最出羣臣之下先見不如呂誨公直不如范純仁程顥敢言不如蘇軾孔文仲勇決不如范鎮今陛下唯安石是信附之者謂之忠良攻之者謂之讒慝若臣罪與范鎮同即乞依鎮例致仕久之得請判西京即洛陽留臺自是絕口不復論新法歐陽脩文名高於世以

風節自持年已六十連被污讟嘗守青州屬京東路今上

疏請止散青苗錢徒知蔡州屬京西路今河南汝甯府富弼判亳州屬淮

南路今安徽穎州府屬州亦坐格青苗法徒判汝州尋皆致仕

安石執政六年老成正士廢黜殆盡儼慧少年超進用事

舉國怨之而帝委任益專慈聖太皇太后嘗語帝曰祖宗

之法不宜輕改吾聞民間甚苦青苗助役宜罷之後又流

涕曰安石亂天下奈何帝始疑之會大旱歲饑東北窮民

流入京城累累不絕監安上門鄭俠繪所見為圖上疏曰

陛下南征北伐皆以戰勝之勢作圖上來無一人以天下

憂苦妻子不相保流離困頓之狀為圖而獻者安上門逐

日所見百不及一亦可流涕況千萬里外哉時帝以天災

憂形於色詔求直言言者皆咎新法安石不自安求去位

乃知江甯府江南東路治即昇州今兩江總督治安石薦韓絳代己呂惠卿

參政二人守其成規不少失時號絳為傳法沙門惠卿為

護法善神惠卿既得勢忌安石復用又數與絳忤絳白帝

復相安石安石罷不一年再入聞命不辭疾走至京後數

月絳與惠卿相繼罷安石再相二年屢謝病請罷帝亦厭

其所為出判江甯府遂不復召

第二章 神宗用兵 附蘇軾詩案

神宗之方用王安石也銳意進取自期立蓋世之功更法

度事聚斂四方騷然而國未嘗富邊疆生事徒耗財帑而國未嘗強自西夏請和後西邊無警者二十餘年李元昊

卒於慶厯末子諒祚立帝即位初邊將种諤襲夏取綏州今陝西綏德州邊釁復起諒祚卒子秉常立大舉入環慶路名今陝西慶

陽府王韶者詣闕上平戎策謂欲取西夏當先復河湟謂黃河湟水之間今甘肅武威漢郡名即西涼府今甘肅涼州府之南洮河蘭

鄯四州名皆屬西蕃今皆屬甘肅洮州府皆故漢郡幸今諸羌瓜分無能統一宜併有之使夏人無所連結安石

以為奇謀始開河湟之役取武勝吐蕃地名今蘭州府狄道州城之置熙河路治熙州即武勝地統熙河洮岷等州以韶為經略安撫使韶取河洮

岷今甘肅鞏昌府屬州等州邊堠益斥而役兵死亡甚多構怨吐蕃致鬼章等屢為寇患

帝以章惇為湖北路名今湖北大半及湖南西北境察訪使經制南北江

事南北江古武陵漢郡名今湖南西部之地蠻獠據之惇招降梅山

在湖南長沙府安化縣西峒蠻遂平南江降五溪雄溪明南接寶慶府新化縣界武溪辰溪也皆蠻又命熊本察訪梓夔路名梓州路今四川中部夔州路

今四川東境貴州北境及湖北施南府擊瀘州名屬梓州路今四川直隸州夷降之復降渝今廣西桂林府生夔交趾劉彝繼之大治戈船禁遏交人來互市

交趾王李乾德大舉擊宋取欽廉邕州三州屬廣西路欽今廣東廉州府屬

州廉今廉州府治聲言中國作青苗助役法以困民今出

邕今廣西南甯府兵相救安石怒遣郭遼等擊敗之宋軍死者過半

河東路沿邊增脩成壘起鋪舍侵入遼蔚今直隸宣化府屬州應山

西大同朔今山西朔平府屬州三州界內遼道宗遣使如宋乞行毀

撤別立界至帝遣官即境上議不能決安石曰將欲取之

必姑與之遣韓縝定新界東西失地數百里帝事太皇太

后極孝后亦慈愛天至帝與大臣議取燕詣后白其事

后曰事體極大吉凶悔吝生乎動得之不過南面受賀而已

萬一不諧則生靈所繫未易以言苟可取則太祖太宗已

取之矣何俟今日帝乃止

安石已罷王珪蔡確用事時蘇軾知湖州屬兩浙路今數

以詩諷刺時事臺官言軾怨謗君父逮繫臺獄太皇太后

謂帝曰嘗憶仁宗以制科得軾兄弟喜曰吾為子孫得兩

宰相今聞軾繫獄得非仇人中傷之乎宜熟察之帝曰謹

受教王珪摘軾詩句言有不臣意遂貶軾安置黃州屬淮

路今湖北黃州府弟轍亦坐救軾而貶坐軾詩案黜罰者司馬光

張方平范鎮等二十餘人神宗實憐軾尋移汝州且復用

矣為蔡確等所沮

元豐三年神宗即位十三年詔改官制帝欲取新舊人兩

用之曰御史大夫非司馬光不可王珪蔡確相顧失色確

唐郡名
即靈州
曰國是方定願少遲之珪憂甚確謂珪曰上久欲收靈武
憲等分道伐夏攻靈州不克士卒凍餒死者十五六帝中
夜得報起環榻而行徹旦不寐

五年官制成以珪爲尚書左僕射兼門下侍郎確爲右僕
射兼中書侍郎帝雖以次敘相珪確不加禮重嘗語輔臣
有無人才之歎尚書左丞蒲宗孟曰人才半爲司馬光邪
說所壞帝不語直視久之曰蒲宗孟乃不取司馬光邪李
憲上再舉之議珪贊之帝命給事中徐禧護諸將往城永
樂故城在陝西綏德州米脂縣西夏人大舉攻拔之將校死者數百人喪

士卒役夫數十萬帝聞奏痛悼不食

神宗在位十八年平生不御宴游勞心政務日昃不暇食
然求治太急進人太銳誤用安石變壞法度竟遺國之大
患常憤國威不伸慨然有攘斥契丹之志欲先取靈夏滅
西羌乃圖北伐及安南失律喟然歎赤子無罪而死永樂
之敗益知用兵之難始息念征伐卒無一事遂意而崩年
三十八

第三章 正邪分黨相擠

神宗崩太子煦卽位是爲哲宗生十年矣神宗母宣仁聖
烈高后爲太皇太后臨朝同聽政后知國民厭苦日久首

散遣脩京城役夫止造軍器及禁庭工技戒中外無苛斂
寬民間保戶馬事由中旨王珪等弗預知也又罷京城邏
卒及免行錢廢濬河司蠲逋賦

仁宗諸臣韓琦富弼歐陽脩等已沒於神宗世文彥博司
馬光猶存光居洛十五年人皆以爲真宰相至是入臨民
爭擁馬首呼曰公毋歸洛留相天子活百姓所在數千人
聚觀之光懼亟還未幾王珪卒蔡確韓縝爲左右僕射章
惇知樞密院事起光爲門下侍郎是時國民拭目以觀新
政而議者謂三年無改於父之道光曰先帝之法其善者
雖百世不可變也若安石惠卿所建爲天下害者當如救

焚拯溺況太皇太后以母改子非子改父眾議少止乃罷
保甲方田市易保馬法

元祐元年

遼道宗太安二年

諫官王覲極言蔡確韓縝章惇等朋

邪章數十上臺諫劉摯呂陶孫覺蘇轍王巖叟朱光庭等
連章論劾太后先黜確以光爲左僕射尋罷縝以呂公著
代之光言文彥博宿德元老起平章軍國重事班宰相上
時年八十餘矣章惇呂惠卿等皆貶竄

光執政兩宮虛己以聽時已得疾然自見言行計從欲以
身徇社稷力疾視事躬親庶務不舍晝夜開言路進賢才
凡王呂所建新法青苗助役之類剗革略盡或曰熙豐舊

臣多儉巧小人他日有以父子之義聞上則禍作矣光正色曰天若祚宋必無此事遂改之不疑安石每聞朝廷變其法夷然不以為意及聞罷助役復差役愕然失聲曰亦罷至是乎良久曰此法終不可罷蓋差役之復識者亦議其不便也安石尋卒光為相八閱月而卒太皇太后哭之慟與哲宗臨其喪贈太師溫國公謚文正京師民罷市往弔哭之如喪私親四方皆畫像以祀

程頤為崇政殿說書蘇軾為翰林學士軾喜諧謔而頤以禮法自持軾謂其不近人情每嘲侮之二人遂成隙頤門人賈易朱光庭等為言官力攻軾呂陶言易等徇私胡宗愈孔文仲又連章詆頤是時熙豐用事之臣退休散地皆銜怨入骨陰伺閒隙而諸賢不悟方自分黨相攻有洛黨蜀黨朔黨之目洛黨以頤為首易光庭為輔蜀黨以軾為首陶等為輔朔黨以劉摯梁燾王巖叟劉安世為首而輔之者尤眾頤罷不復召久之軾亦罷後再入三人皆不久而出

呂公著以老辭位乃拜司空同平章軍國事尋卒呂大防范純仁為左右僕射蔡確失勢怨望臺諫言確譏訕朝廷乞正其罪論之不已遂安置新州

屬廣東路今廣東肇慶府新興縣

純仁

曰聖朝宜務寬厚不可以語言文字之間竄誅大臣且以

重刑除惡如以猛藥治病其過也不能無損焉爭之不得
臺諫交章攻純仁黨確純仁辭位確至新州未幾卒自司
馬光卒王呂之黨多爲蜚語以搖在位大防等畏之欲用
其徒以平舊怨謂之調停蘇轍等力陳其不可乃止劉摯
蘇頌相繼爲右僕射頌罷純仁又代之

宣仁太后聽政九年以至公治國不加恩外家以擁佑幼
孫之故二子一女皆疏當世賢者畢集於朝後世以慶厯
元祐並稱人以爲女中堯舜承神宗厭兵之後與民休息
吐蕃鬼章爲邊將禽獻釋不殺以招其部屬夏主秉常卒
子乾順立已與宋和受其冊命而屢侵擾邊境亦不加討

伐詔諸路嚴兵自備而已遼道宗戒羣臣曰南朝盡行仁
宗之政矣謹勿生事於疆場臨崩謂呂大防范純仁等曰
老身沒後必多有調戲官家者宜勿聽之公等亦宜早退
令官家別用一番人后崩哲宗始親政羣小力排垂簾時
事禮部侍郎楊畏首叛大防上疏乞紹述神宗之政且勸
相章惇紹聖元年哲宗九年遼
太安十年大防純仁皆罷召章惇爲
左僕射惇旣至引其黨蔡京京弟卞等居要地以漸盡復
熙豐之政治元祐諸臣之罪無虛日司馬光呂公著王巖
叟傅堯俞等已死者皆奪其贈諡追貶大防純仁劉摯梁
燾范祖禹劉安世韓維蘇軾蘇轍王覲呂陶孔文仲程頤

賈易朱光庭孫覺等三十餘人皆連貶竄文彥博已以太師致仕亦降爲太子太保尋卒

哲宗皇后孟氏宣仁后所選聘也在中宮五年遭讒而廢章惇蔡卞遂誣宣仁嘗有廢立計請追廢之賴向太后泣諫事得寢惇卞堅請施行哲宗怒曰卿等不欲朕入英宗廟庭乎抵其奏於地

第四章 徽宗昏德

哲宗在位十五年崩無子弟端王佶立是爲徽宗欽聖憲肅向太后權同聽政擢韓忠彥韓琦子爲右僕射收敘范純仁蘇軾追復司馬光文彥博呂公著等三十三人官太后

垂簾半年而還政未幾崩章惇蔡京蔡卞等爲臺諫所攻相繼貶竄韓忠彥曾布爲左右僕射布初附惇已而叛之然知帝意在紹述熙豐漸排元祐諸臣正議之士不容於朝遂罷忠彥職再追奪司馬光等官籍記元祐黨人蔡京復入代布爲相又貶竄忠彥等令州縣立姦黨碑圖熙豐功臣於顯謨閣以王安石配享孔子

蔡京執政二十年其間暫罷者三趙挺之張商英鄭居中等爲相稍與京立異然於京之權寵無損也京子攸亦嬖於徽宗至權勢與父相軋滿朝皆其父子之黨內侍童貫以佞媚得幸專務應奉以蠱上心京使貫領兵擊吐蕃復

所嘗失三州遼郡廓皆在甘肅西甯府境內貫遂建節為三路熙河蘭湟秦鳳今甘肅蘭州西甯鞏昌三府秦階二州安撫使恃功驕恣選置將吏皆取中旨不復關朝廷

是時宋朝升平府庫盈溢蔡京託紹述之名益脩財利之政以為當豐亨豫大之運專以奢侈勸徽宗窮極土木之功命朱勔搜集東南珍奇舳舻相銜於淮汴號花石綱嘉花名木怪石珍禽奇獸無遠不致民間有一花一木之妙輒令上供作延福宮六位殿閣亭臺相望巖壑幽勝宛如天成又作萬歲山山高林深禽獸成羣園池臺觀備極巧妙徽宗崇道教自言見天帝降臨建迎真宮作天真示現

記置道階道官立道學編道史作玉清神霄宮以奉安道像自號曰教主道君皇帝寵信方士林靈素等其徒美衣玉食者幾二萬人

第五章 遼末諸帝

契丹建國百年至聖宗尤盛一舉而攘卻宋師再舉而蹂躪河朔宋人長絕北伐之念然犄角窮兵輒不免挫衄高麗自太祖王建開國世朝貢南朝五傳至成宗治始受制於遼聖宗以鴨綠江東地賜之治卒穆宗誦立大臣康肇弒誦而立顯宗詢聖宗自將討破之獲康肇進圍開京高麗國都今京畿道開城府詢棄城走師還諸降城復歸高麗詢遣使乞

稱臣如故詔取江東六州

興鐵通龍龜郭皆在平安道西境

詢不從乃連

發兵討之戰於茶陀二河

俱在平安道龜城府界內

大敗而還詢尋請

降後不復叛帝又遣將擊回鶻圍甘州

今甘肅甘州府

亦敗還自

是党項準布諸部多叛聖宗能勤於政舉才行察貪殘理

冤滯抑奢僭賑窮乏城遼西

秦漢故郡名

建為中京大定府

王牙帳在內蒙古喀喇沁右翼南

自上京移都之在位四十九年遼國治

強齊天皇后無子養庶子宗真立為太子宋仁宗天聖九

年遼太平

帝崩太子即位是為興宗生母蕭元妃自立為

太后攝政遷齊天后於上京殺之又陰謀立少子重元重

元告之興宗興宗嘉之立為太弟收太后符璽遷之慶州

屬上京道在臨潢府西今內蒙古巴林旗西北

後迎歸侍養益謹初夏人叛宋建

國故事遼甚恭興宗時党項諸部叛去夏主元昊助之帝

自將討夏不克許之和而還建雲州為西京大同府

古平城地

今山西大同府

以鎮西邊於是北朝所統京五

上京臨潢府中京大定府南京析津

府東京遼陽府西京大同府

府六

定理率賓鐵利安定長領鎮海皆在盛京吉林二省界內

州軍城

百五十六屬國六十帝嘗欲南伐感宋使富弼之言增其

歲幣而申和好兩國得免兵禍在位二十四年雖無善政

可稱國之強盛自若也

興宗以宋至和二年

仁宗三十三年興宗重熙二十四年

崩長子燕趙王洪

基立是為道宗以太弟重元為太叔重元負寵驕恣與其

子楚王尼嚕固舊作涅魯古謀反樞密使耶律仁先耶律伊遜

舊作耶律乙辛討平之道宗勸農興學詔求直言初政頗可觀既

而伊遜專權勢傾中外忌懿德皇后明敏讒而殺之太子

濬后所生也亦為伊遜所構誣帝廢濬徙於上京伊遜竊

令人殺之又欲害濬子延禧帝始惡其專恣出之興中府

屬中京道唐營州都督府治今直隸承德府朝陽縣地故城在內蒙古土默特右翼西後謀亡入宋

事覺伏誅帝在位四十六年自伊遜用事羣邪競進忠士

斥逐諸部反側兵革歲動以宋哲宗崩之明年徽宗建中靖國元年

道宗壽隆七年崩燕王延禧立號天祚帝追尊父濬曰順宗戮伊

遜屍誅其黨與時國勢已衰武備頽弊天祚闇弱不能振

作在位二十四年正與徽宗同世南北俱當末運東夷乃

起而乘之遼先亡而宋亦繼壞矣

第四篇 宋下

第一章 金滅遼

遼之東邊有女真族蓋東胡別種也其地南接高麗東至日本海漢魏謂之挹婁後魏謂之勿吉三韓隋唐謂之靺鞨唐初有黑水粟末二大部後粟末盛強建渤海國黑水靺鞨役屬之渤海既滅靺鞨之民居混同江今名松花江在吉林省界內西南者繫籍於遼號熟女真居江東者不籍於遼號生女真然亦臣屬焉後避興宗諱改真為直生女直僻處東北風俗極樸陋其民鷙悍善騎射有完顏部者世居按春舊作按水按出虎土言金也今云阿勒楚喀河之源初甚出虎發源小白山之北北流入松花江

微道宗時完顏烏古鼎舊作烏古迺襲遼叛臣禽而獻之始為

節度使烏古鼎有九子合理博舊作勃里鉢蒲拉舒舊作頗刺淑盈

格舊作盈哥相繼襲職兄弟叔姪同心協力務開疆土兵勢漸

強遂雄諸部

合理博有十一子第二子曰阿古達舊作阿骨打沈毅有大志

合理博臨終謂盈格曰長子烏雅舒舊作烏雅束柔善若辦集

契丹事阿古達能之故盈格傳位烏雅舒以及阿古達時

遼天祚帝荒於禽色不恤國政每歲遣使索名鷹海東青

於女直女直發甲馬侵其東北鄰五國國名今吉林省三姓地獲此

禽以獻不勝其擾諸邊帥又徵求無藝阿古達遂叛遼舉

諸部兵得二千五百人攻克甯江州屬東京道在今吉林

東岸迎擊遼軍於珠赫舊作出河店地名在吉林省伯都訥城南

內大敗之宋政和五年徽宗十五年諸酋勸阿古達稱帝

國號大金是為太祖武元帝以弟烏奇邁舊作吳乞買為阿木

班貝勒舊作諳班勃極烈從兄薩拉噶舊作撒改合理弟舍音舊

也斜為固倫貝勒舊作國論勃極烈天祚帝遣使齎詔書諭太祖降

太祖報書亦諭天祚降攻黃龍府取之天祚下詔親征兵

號七十萬進渡混同江會有一大帥亡歸反於上京天祚

乃引還太祖追及於和斯布達舊作護步答岡在混同江西大敗之

又遣薩拉噶弟幹魯襲破遼叛將於遼陽於是東京州縣

及熟女直皆降於金天祚以族父秦晉王瀆為都元帥會

四路上京中京黃龍府興中府兵於徽州屬上京道在內蒙古奈曼部界內金將幹魯

古擊走之取遼八州顯乾懿壕徽成川惠

遼人既屢敗請成於金或言於太祖曰自古英雄開國必

先求大國封冊太祖從之求封冊於遼且曰必以兄事我

歲貢方物遼七遣使議冊禮遂冊為東懷國皇帝文無兄

事之語又不稱大金而云東懷即小邦懷其德之義太祖

怒卻之遼復遣蕭錫里舊作習泥烈往議太祖不許和議遂絕

初宋童貫既得志於西羌遂謂契丹亦可圖乃自請使遼

以覘之燕人馬植見貫陳取燕之策貫挾以歸易姓名曰

李良嗣良嗣見徽宗說與女直夾攻遼徽宗嘉之賜姓趙

氏其後聞女直建國屢破遼師遣馬政由海道如金通好

太祖遣使報聘宋人諭以夾攻之意差呼慶送其使太祖

語慶曰歸見皇帝果欲結好早示國書若仍用詔決難行

也慶歸宋更遣趙良嗣往

太祖自將伐遼以蕭錫里趙良嗣從行謂之曰汝可觀吾

用兵以卜去就進攻上京克其外城守將以城降太祖乃

還良嗣謂太祖曰兩國夾攻金取中京燕雲本漢地宋取

之太祖許之因邀歲幣以手札付良嗣使還期以金兵自

平地松林蒙古名阿它尼喀喇莫多在內趨古北口關名在順

蒙古克什克騰部西潢河之源

天府密雲河名在直隸保定府定興縣南宋兵自白溝夾攻徽宗遣馬政

持國書往訂彼此兵不得過關歲幣如與遼之數

天祚畋遊不悛忠臣多被疏斥長子晉王阿咾罕舊作敖

仁孝有人望樞密使蕭奉先諷人誣晉王母文妃與都統

耶律伊都舊作耶律余覲等謀立晉王天祚遂賜文妃死伊都大

懼叛降於金薩拉噶子尼瑪哈舊作黏沒喝曰遼主失德中外

離心今乘其釁中京可取太祖然之以舍音都統內外諸

軍從弟普嘉努舊作蒲家奴合理博弟劾孫之子及尼瑪哈皇子幹布舊

幹喇布舊作幹離不烏奇邁子博勒郭舊作蒲盧虎等副之伊都

為鄉導以趨中京攻克之天祚時獵於鴛鴦灤湖名蒙古名昂吉爾

圖在內蒙古阿巴噶右翼西南伊都引敵奄至天祚憂甚奉先曰伊都來

欲立晉王耳若為社稷計不惜一子誅之可不戰而退天

祚乃使人縊阿咾罕諸軍聞之流涕人心解體金兵逼行

宮天祚率衛士五千餘走西京尼瑪哈率金兵追之天祚

計不知所出乘輕騎入夾山在山西朔平府城東北邊牆外始悟奉先之

不忠揮之勿從尋被誅金兵進克西京

時秦晉王瀆守燕京參政李處溫等立瀆為主號天錫帝

以軍事委耶律達什舊作耶律大石宋童貫蔡攸帥師伐燕達什

與都統蕭幹擊卻之已而瀆病死幹等立瀆妃蕭氏為太

后主國事以李處溫謀反賜死童貫蔡攸再舉兵遼將郭

藥師以涿易二州屬南京道涿今順天府屬州易直隸直隸州降於宋宋軍進

駐盧溝河名在今京城西南蕭幹出拒藥師聞道襲燕幹還救死鬪

藥師敗走盧溝之師遂潰貫不克成功懼得罪密遣客禱

金圖之太祖由居庸關在順天府昌平州西北入燕遼羣臣奉表降

太祖命守舊職撫定州縣而還蕭妃蕭幹西走天祚殺蕭

妃追廢溇為庶人幹奔奚

初宋與金約但求石晉賂契丹故地而不思營平灤三州

屬南京道營今直隸永平府昌平縣平永平府治灤永平府屬州乃劉守光所與者既宋

相王黼悔之欲併得三州屢遣趙良嗣求之太祖不許且

責宋出兵失期止許與燕京及山前六州薊景檀順涿易今順天府及直

隸遵化州易州及既克燕贈書曰燕京用本朝兵力攻下其租稅

當輸本朝宋遂約歲幣四十萬之外加代稅錢百萬緡且

許更與糧二十萬石以得燕京六州金人驅燕之職官富

民東徙貫收入燕所得空城而已

幹魯幹刺布等復西伐至居庸關禽耶律達什強使為鄉

導追襲天祚於青冢寨名在大同府城西北塞外獲其子女族屬輜重

牧馬天祚奔雲內州名屬西京道在內蒙古烏喇特布西北夏主李乾順遣使

請天祚臨其國天祚乃南渡河都統蕭迪里舊作特烈等立天

祚子梁王雅里為帝雅里尋死迪里亦為亂兵所殺蕭幹

自立為奚帝引兵攻燕與郭藥師戰敗走死

女直初無文字及獲契丹漢人始通契丹漢字太祖頗留心於文事使諸子皆學命完顏希尹製女直字頒行之又令所在訪求文學之士敦遣赴闕金人命名皆本其國語及通漢文義又用漢字製名太祖名旻烏奇邁名晟舍音名杲尼瑪哈名宗翰幹布名宗幹喇布名宗望博勒郭名宗磐蓋國語之名便於彼此相呼而詔令章奏則用漢名也宋宣和五年徽宗二十三年遼保大三年金太祖天輔七年太祖崩在位九年弟晟立是為太宗文烈帝以杲為阿木班貝勒宗幹為固倫貝勒

六年金太宗天會二年夏國奉表稱藩於金耶律達什自金逃歸

天祚天祚復渡河東遷謀出兵收復燕雲達什諫曰當養兵待時而動不聽與金人戰敗走山陰謂夾山之北七年遂趨

党項為完顏洛索舊作婁室所追擒太宗封為海濱王遼稱帝

九世太祖太宗世宗穆宗景宗聖宗興宗道宗天祚帝二百十年而亡達什者遼

太祖八世孫也率眾西走謀興復巴什伯里舊作別失八里今烏魯木

齊之回鶻迎降願為附庸征行千餘里軍勢益盛至別喇

薩軍城名在吹河上今俄國中亞細亞七州界內其王棄國而遁達什因建都

城名呼遜鄂爾多舊作虎思幹耳朵自立為闊兒汗號天祚帝是

為西遼德宗遂出兵征略都兒格諸部時塞而柱克見後王

桑察兒霸有西亞細亞自將諸國兵攻西遼進渡亞母河

德宗擊走之悉平河東地貨勒自彌後見亦降爲屬國

第二章 金克宋京

遼帝之西走也平州軍亂殺節度使州民推副使張穀領
州事金人入燕穀降之金以爲留守已而穀以州叛請降
於宋玉黼勸徽宗納之趙良嗣諫曰國家新與金盟如此
必失其歡後不可悔不聽金太宗使弟闍母及宗望襲平
州穀奔燕金人責宋納叛宋不得已命邊帥縊殺穀函送
其首

宋內侍譚稹宣撫兩河燕山路兩河謂河東路河北東西
路燕山即燕京六州地

招納金叛亡金索宋所許糧稹不與曰良嗣口許豈足憑

也金人大怒遼帝在山陰宋密遣人誘降命童貫代稹宣
撫將迎遼帝遼帝畏宋不可仗不來宗望遣人如宋索叛
亡戶口宋不遣且聞燕山治兵請於太宗曰苟不先舉伐
宋恐爲後患耶律伊都劉彥宗亦言南朝可圖師不必眾
因糧就兵可也及既獲遼帝即決意南伐以阿木班貝勒
杲領都元帥居京師宗翰爲左副元帥自西京趨太原府
名
河東路治今
山西首府宗望自平州入燕山童貫自太原逃歸汴知
府張孝純歎曰平時童太師作幾許威望今乃畏怯如此
何面目復見天子乎宗翰圍太原孝純悉力固守宗望取
燕郭藥師降之以爲鄉導長驅而進宋人奔竄莫敢撓鋒

金軍既深入宋相白時中等唯建出奔之策而已徽宗急下詔罪己徵兵四方傳位太子桓是爲欽宗太學生陳東等伏闕上書乞誅戮蔡京童貫王黼梁師成李彥朱勔六賊以謝天下黼以邪佞致位首相誤國事者也師成以宦者用事竊弄威福者也彥以根括農田破蕩民產結怨於西北者也勔以花石綱擾害州縣聚怨於東南者也欽宗誅彥竄黼勔尋殺之師成童貫蔡京父子前後皆誅竄欽宗遣使至金軍請和宗望不許靖康元年金天會四年宗望進渡河欽宗欲奔兵部侍郎李綱泣諫願以死守宗社欽宗乃以綱爲親征行營使治守戰之具金軍圍汴京綱力戰

禦之太宰李邦彥等皆欲割地求和遣使詣金營宗望謂

之曰宋京破在頃刻若欲議和當輸犒師金五百萬兩銀

五千萬兩牛馬萬頭表段百萬匹割中山府名屬河北西路今直隸定州

太原見河間府名屬河北東路今屬直隸三鎮地尊金帝爲伯父以宰

相親王爲質使歸欽宗一依其言使弟康王構與少宰張

邦昌往質括借京城民財僅得金二十萬銀四百萬而藏

蓄已空

既而四方之師漸至欽宗又欲戰都統制姚平仲夜襲金營不克遁去欽宗大懼廢行營罷李綱以謝金人陳東及都人數萬詣闕乞復用綱欽宗勉從之充綱防禦使眾始

退金人疑康王非親王請以他王代之欽宗命弟肅王樞
往康王張邦昌還遂遣使與割三鎮御筆書宗望得書不
俟金幣數足而引還宋又密詔三鎮固守不割宗翰亦還
西京留軍圍太原金以宗望爲右副元帥是歲高麗王王
楷奉表稱藩以事遼之禮事金太宗賜以保州地

今朝鮮平安道

州安

宋以耶律伊都本遼貴戚當有亡國之感密遣蠟書使爲
內應爲宗望所得又聞耶律雅里在西夏之北欲致書招
之亦爲宗翰所得太宗聞之甚怒復命兩帥分道伐宋宗
望克真定

府名河北西路治今直隸正定府

長驅抵汴宗翰克太原執張

孝純克河東諸郡克洛陽抵汴二帥所向無敵官吏棄城
走者遠近相望宋累遣使請和二帥要盡割河東河北地
宋相唐恪耿南仲等恃和議不設戰備有卒郭京者言能
用六甲法生禽金兩將欽宗賜金帛數萬使自募兵京盡
令守禦人下城自坐城樓上出兵挑戰金人鼓譟而進京
兵敗死京曰須自下作法因引餘兵遁去金兵登城城兵
披靡大潰欽宗率大臣詣金營奉表請降獻兩河地金人
更索金一千萬錠銀二十萬錠帛一千萬匹欽宗還大括
民財不能盈數靖康二年金人再邀欽宗至營命未有司
行根括甚急續逼徽宗出宮后妃太子宗戚男女三千餘

人悉赴軍前城中子女金帛寶玩車服器用圖書無不邀索公私上下俱空二帥令宋百官議立異姓百官希金旨連署推張邦昌金人冊邦昌為楚帝以二帝以下北還徽宗在位二十五年内禪欽宗僅一年餘而失位太宗召二帝至會甯府名金之舊土為京師即按春水源之地在吉林省甯古塔城西封徽宗為昏德公欽宗為重昏侯後遷於五國城又曰五國頭城今以吉林省三姓城卒

第三章 高宗南渡

附金立劉豫又廢之

汴京受圍時康王構出在相州屬河北西路今河南彰德府欽宗遣使拜王為大元帥汪伯彥宗澤為副王領兵渡河將入衛聞

京城陷移軍東平

府名屬京東西路今山東泰安府東平州

進次濟州

屬京東西路今

山東濟甯州

及金人去張邦昌恐宋人不服已迎哲宗廢后孟

氏入宮聽政以后手書俾康王嗣統宗澤等勸王趨南京

本宋人歸德軍治今河南歸德府治

即位是為高宗尊孟后為太后召李綱

為右僕射兼御營使貶竄主和誤國者李邦彥耿南仲等

及張邦昌黨與邦昌後伏誅

綱整軍政講邊防以宗澤守汴金人憚之而黃潛善汪伯

彥復主和高宗怯懦日與潛善等為避敵之計綱相七十

餘日而罷誅上書論事者陳東歐陽徹決策南幸至揚州

淮南東路治今江蘇揚州府

時金宗望已卒宗翰與宗望之弟宗輔宗

弼完顏洛索等分道伐宋連克諸郡建炎二年金天會六年宗弼至汴為宗澤所敗澤招撫羣盜募四方義士合百餘萬糧支半歲表疏連數十請車駕還汴潛善等從中沮之澤憂憤而沒

三年宗翰渡淮將至揚州高宗得報亟出奔鎮江兩浙路

今屬蘇潛善伯彥等方聽僧說法罷會食吏呼曰駕已行矣

二相倉皇乃戎服南馳高宗遂如杭州兩浙路治今罷潛

善伯彥御營將苗傅劉正彥作亂逼高宗傳位於皇子尊

請孟太后聽政呂頤浩張浚韓世忠會兵討亂者高宗復

位傅正彥走世忠追獲誅之高宗以浚為川謂成都梓州利州夔州四

路大抵今四川陝謂永興鄠延環慶涇原秦京謂京西南北路今境北湖謂荆湖南北路大抵今陝甘京河南之大半及湖

宗翰還西京宗輔還燕京宗弼復請於太宗大起燕雲河

朔兵伐宋下令禁民漢服又令髡髮遵金俗不如式者殺

之遂自兩道渡江破江東又曰江南東路今江蘇江西又

仍曰江西諸郡高宗奔明州屬兩浙路今乘船避敵四

年次於温州屬兩浙路今宗弼焚臨安府名即飽掠北還

高宗回駐越州屬兩浙路今兩江復為宋然四京東京開

京河南府南京應天府北京大名府竟皆屬於金洛索攻陝西張浚出兵拒

之太宗遣宗輔往督師宗弼自淮上引兵西馳與洛索合

浚合五路

熙河秦鳳涇原環慶利州

兵四十萬至富平

縣名屬永興路耀州今陝西

安府屬縣

洛索力戰敗之宋軍皆潰浚退保興州

屬利州路今陝西漢中府

略陽縣

遣吳玠守鳳翔

府名屬秦鳳路今屬陝西

之和尙原

在寶雞縣西南

宗翰之南下也太宗諭之曰俟宋平當援立藩輔如張邦

昌者及取京東西

京東東西路及京西北路大抵今山東河南

宗翰建議冊劉

豫為齊帝豫本宋臣知濟南府

屬京東東路今山東首府

以地降金為

京東安撫使節制河外諸軍至是為金子皇帝以張孝純

為丞相都大名尋徙居汴

紹興元年

金天會九年

宗弼攻吳玠於和尙原玠與弟璘力戰

大破之金已得陝西地悉以賜齊宗輔東還使薩里干

撒離喝

守衝要三年薩里干克金州

屬利州路今長驅趨洋

州名屬利州路今漢中府洋縣

漢古漢中郡

玠引兵疾馳扼饒風關

在漢中府

西鄉縣

金人擊破之入興元食盡引還四年宗弼與薩里

干破和尙原進攻仙人關

在漢中府鳳縣西南

玠璘擊卻之金人還

屯鳳翔為持久計張浚本欲由關陝取中原乃盡喪關陝

賴得玠璘保蜀而已以無功召還

齊主劉豫遣將攻宋取襄

京西南路治今湖北襄陽府

鄧屬京西南路今河南南陽

州府屬等州宋使岳飛擊之克復諸郡豫乞師於金太宗命

宗輔宗弼從弟達賚

舊作撻懶盈哥子

援之豫遣其子麟姪猊將

兵會金軍南下宋相趙鼎勸高宗親征御舟次平江

府名屬兩

浙路今江蘇州府韓世忠屯揚州大敗金軍於大儀鎮名在揚州城西今屬江蘇揚州府

甘泉縣宗弼等不得志又聞太宗疾篤引兵還麟猊棄

輜重遁五年金天會十三年高宗還臨安遂定都焉

金以阿木班貝勒為最尊官即儲副也自皇弟杲卒其位

久虛宗幹宗翰等以太祖之孫亶嫡統當立定議入奏太

宗以義不可奪捨己子宗磐而立亶為阿木班貝勒宗磐

宗幹宗翰並為固倫貝勒宗翰兼都元帥太宗在位十二

年崩亶即位是為熙宗尊考宗峻為景宣帝追帝始祖函

普以下十君以宗磐宗幹宗翰為三師並領三省事紹興

七年金熙宗天會十五年宗翰所善高慶裔以賊誅宗磐素忌宗翰

欲因挫之多治其黨宗翰以憂死達賚為左副元帥宗弼為右副元帥

宋自徽宗末年羣盜蜂起至南渡後益劇大者數十萬小

者數萬人江江南東西路淮淮南東西路楚荆湖南北路粵廣南東西路率為

盜藪諸將分討隨剿隨起韓世忠岳飛等剿撫數立奇功

洞庭賊楊太最盛飛招降其驍將急攻水寨太窮蹙赴水

死湖湘謂洞庭湖及湘水之濱即今湖南也平飛又數破齊兵請進取中原

高宗不許

初劉豫因宗翰得立奉之特厚諸將多憾之豫欲擊宋請

援於金宋王宗磐沮之熙宗遣宗弼提兵黎陽縣名河北西路瀋州

治今河南衛輝府濬縣以觀釁豫使麟猊分道入淮西即淮南西路今安徽江淮之閒及河南光州湖北黃州府敗還金人詰其狀始有廢豫之意及宗翰卒豫又乞師熙宗令達賚宗弼偽稱南征馳入汴宣詔廢之與家屬徙臨潢齊建國八年而亡

第四章 金宋講和

宋自二帝北遷中原淪陷舉國怨金人徹骨思有以報之而完顏氏國勢方盛羣臣輯睦士馬精強宋承累世積弱之餘兵氣自餒每與金人遇十戰九敗高宗乏統御之才朝論數動國是不定勇者浪戰以挑強寇弱者假和議以圖偷安是以封疆日蹙敵人益張高宗數募人使金名祈

請使稱臣奉表以求緩師且請還二帝金人不許使者多被拘囚王倫嘗奉使問二帝起居時宗翰等方大舉南下倫邀說百端欲使其還二帝歸故地宗翰不答拘於雲中唐故郡名即西京大同府其後宗翰有許和意縱倫歸報值宋齊交兵議遂中格

初秦檜在汴京爭立異姓之議為金人所執從二帝至燕太宗以檜賜達賚為其任用達賚素持和議縱檜使還檜見宰執曰欲天下無事須是南自南北自北張浚薦之漸用事及聞徽宗及鄭太后崩於五國城高宗復以倫充使奉迎梓宮及生母韋后并乞河南地劉豫既廢達賚自河

南還請以齊舊地與宋熙宗會羣臣議宗幹力言其不可
宗磐贊達賚議遂遣使偕倫如宋時檜已專朝政請使倫
再如金定議金以張通古爲江南詔諭使與倫偕至言先
歸河南陝西地徐議餘事高宗聞金使以詔諭爲名心不
自安詔羣臣議和好得失直學士院孫開等二十餘人皆
極言不可和樞密院編輯胡銓抗疏請斬倫檜及參政孫
近羈留虜使責以無禮檜怒謫銓廣州李綱張浚韓世忠
岳飛皆自外上疏論諫檜懼生變力排言者謀奪諸將兵
權士論藉藉皆咎檜及通古還世忠欲要殺之以壞和議
不克而罷時紹興八年金熙宗天眷元年也九年王倫受命至汴

受地於金

金宋王宗磐自以太宗長子跋扈甚太祖子陳王宗雋爲
左丞相達賚方持兵柄俱附宗磐達賚嘗與秦檜善故力
成和議宗弼以割地與宋爲非計言於熙宗曰達賚宗磐
主割地必有陰謀今宋使在汴勿令踰境宗磐宗雋達賚
遂謀反相繼伏誅宗弼爲都元帥王倫將赴金都議事途
被執時歲貢正朔誓表冊命等事議久不決十年熙宗遂
變約使宗弼取河南薩里干取陝西宋劉琦敗宗弼於順
昌府名屬京西北路今安徽潁州府岳飛敗之於郾城縣名屬京西北路潁昌府今河南許
州屬進至朱仙鎮在河南開封府城南兩河豪傑往往應飛秦檜奏

急諭飛班師諸將皆還鎮十一年金皇統元年宗弼渡淮入廬

州屬淮南西路今安徽廬州府劉琦楊沂中敗之於橐皋鎮名在廬州府巢縣西北

高宗復召還諸將遣使乞罷兵宗弼遺檜書曰爾朝夕以

和請而岳飛方為河北圖必殺飛始可和樞密使張浚素

忌飛構成其罪檜逮飛父子下獄殺之飛有神力能挽弩

三石忠義出於天性御軍嚴而有恩善以少摧眾金人所

畏者惟飛及聞其死諸將酌酒相賀韓世忠見事不可為

辭官去

宗弼許和割淮水為界唐鄧二州俱屬京西南路入金屬汴京路唐今河南南陽

府唐縣鄧今南陽府屬州入金陝西以大散關在陝西鳳翔府寶雞縣西南和尚原之西為

界歲貢銀絹二十五萬兩匹高宗先已稱臣金人不以帝

稱之而言康王十二年熙宗遣使以袞冕圭冊冊康王為

宋帝歸梓宮及韋太后自是信使往來不絕

和議已成秦檜自以為功惟恐人議已起文字之獄以傾

陷善類附勢干進之徒承望風旨有一言一句稍涉忌諱

者無不爭先告訐異議之人如趙鼎張浚等貶竄殆盡攬

權十有八年高宗仰成而已嘗書趙鼎李光胡銓三人姓

名於閣必欲殺之鼎已竄死於海南而憾不已下鼎子汾

獄使汾自誣與張浚及光銓等五十三人謀大逆會檜病

死始得免

第五章 金亮淫虐

附高宗內禪

金熙宗委政於從父宗幹宗弼雖國家多故而吏清政簡百姓樂業既而裴滿后干政熙宗為其所制因縱酒自遣屢酗怒殺從臣時宗幹宗弼已卒宗幹子平章政事亮密謀篡位紹興十九年金皇統九年亮讒殺二皇弟胙王元及查刺帝積怒於后亦殺之亮因亂弑帝而自立熙宗在位十四年帝亮殘忍肆虐大忌骨肉殺太宗子孫七十餘人宗翰子孫三十餘人杲子孫百餘人諸內族數十人草薶株連幾無噍類又殺宋遼皇族百三十餘人勳舊大臣亦多誅夷宗室被殺者選其婦女為妃妾宗婦諸從姊妹滿後宮荒

淫穢亂無復人理

初金取遼五京襲其舊稱仍居金源即按春水之源之地名會甯

府熙宗升會甯為上京改遼上京為北京亮慕中國侈靡之俗以上京僻在一隅遷都於燕大營宮殿務極華麗盡毀上京宮廟削上京北京之號改燕京為中都大興府以中京為北京汴京為南京而東京西京如舊

亮欲滅宋開一統之業嘗因遣使密隱畫工俾寫臨安湖山以歸題詩其上有立馬吳山第一峰之句籍諸路兵雖親老丁單亦不許留侍大括民馬令戶自養以俟營汴宮徙居之紹興三十一年金正隆六年遂渝盟南伐嫡母圖克坦

舊作徒單太后諫亮殺之以威眾兵六十萬由五道進亮自將克淮西諸郡欲由采石江津名在安徽太平府城西北濟江為宋兵所破會聞從弟烏嚕舊作烏祿已自立於遼陽大愕乃回揚州召諸將約三日必濟過期盡殺諸將遂弒亮舉軍北還亮在位十二年而亡

方亮之發汴遼陽一軍亡歸公言於路曰我輩往東京立新天子矣入東京奉留守烏嚕即位烏嚕漢名雍許王宗輔之子也是為世宗追尊宗輔曰睿宗遂入燕追廢亮為海陵王後又降為庶人世宗詔散南征之眾遣使諭宋宋報聘書用敵國之禮

初宋太祖以國授太宗約兄弟相傳仍及於其子太宗背之而自傳其子孫至徽宗朝獨推濮王胄裔以為近屬太祖之後皆零落僅同民庶汴京之亡太宗子孫多遭金人之虐徽宗之子九人唯存高宗高宗早喪太子專後竟無子於是選太祖後得秦王德芳六世孫伯琮鞠於宮中為皇子遂立為太子賜名昀高宗在位三十六年而內禪太子即位是為孝宗

第六章 兩國賢主同世

金亮之開釁也宋兵取唐鄧二州屬金山東東路泗屬見上海今江蘇直隸州泗屬屬金山東東路泗屬山東西路今諸州吳璘自蜀出兵取陝西十三州秦隴洮安徽直隸州秦隴洮

河蘭會商
號陝華

孝宗詔璘班師十三州復入金世宗以宋不稱

臣命都元帥僕散忠義往南京節制諸軍副元帥紇石烈

志甯駐軍淮陽

故郡名即陳州屬南
京路今河南陳州府

諭曰宋若歸侵疆貢

禮如故則可罷兵孝宗以張浚為樞密使督師江淮志甯
以書抵浚欲凡事一依熙宗以來故約不然請會兵相見
浚遣將襲金軍破之既而兵潰金人不追孝宗銳意恢復
以是役不利乃議講和浚為右僕射仍以都督視師數月
而罷

先是兩國遺書用君臣之禮金曰下詔宋曰奉表大宋去
大字皇帝去皇字金使至宋則宋帝起立問金帝起居降
坐受詔館伴之屬皆拜金使宋使至金自同陪臣孝宗三
遣使議和始為叔姪之國得稱皇帝改詔表為國書易歲
貢為歲幣歲幣減銀絹各五萬地界如熙宗之時而餘禮
竟不能盡改孝宗屢請改受書儀且還河南陵寢地世宗
不許

世宗賢明仁恕金人號為小堯舜龍潛時夫人烏凌噶

舊作

烏林

氏逼於海陵守節而死世宗追冊曰昭德皇后終身

不立后雅尚儉素宮中之飾不用黃金或有興造即損宮
中歲費以充之誠宗戚當務儉約無忘祖宗艱難嘗謂從
官曰女直舊風最為純直汝等當習學之不可忘也遂禁

女直人學南人衣飾命學士以女直字譯經史令京府設學養士又建女直太學

世宗嘗謂太子曰天下當無復有經營之事汝惟無忘祖宗純厚之風勤脩道德明信賞罰昔唐太宗謂高宗曰吾伐高麗不克終汝可繼之如此之事朕不以遺汝太宗又黜李勣以遺高宗君人者焉用偽爲受恩於父安有忘報於子者乎舉賢求言待臣下以誠輯睦宗族以受海陵屠戮之後太祖子孫無幾曲爲保全從弟壽王京宋王宗望之子謀逆當誅猶貸其死宋欽宗卒於海陵末年帝葬以一品禮宋遼宗室死者皆葬之鞏洛鞏河南府屬縣縣西南洛水上宋諸陵在焉廣甯

府名屬北京路遼諸陵所
在今盛京錦州府廣甯縣舊陵最用心民治慎守令之選嚴廉察之責罷諸關征去金銀坑冶之稅不禁民采羣臣守職上下相安刑部斷死罪至歲或十七人在位二十八年民富國強夷蕃賓服金史所載嘉謨懿訓甚詳較貞觀政要更多數倍

西夏高麗自遼亡皆臣附於金夏崇宗乾順卒於熙宗時子仁宗仁孝立國亂其臣任得敬抗禦有功專政二十餘年陰蓄異志誣殺宗親大臣仁孝不能制分其國與之上表於金爲得敬求封世宗曰此必權臣逼奪非夏王本意朕爲四海主甯容此邪彼若不能自正則當以兵誅之不

許其請得敬始有懼心仁孝乃誅之高麗仁宗楷卒子毅宗覲立世宗時武臣作亂廢覲以立弟明宗皓以讓國奏告帝卻其使而命有司詳問皓取覲表言父楷遺訓傳位於皓帝乃授封冊其後高麗西京今平安道平壤府留守趙位寵以慈悲嶺在平壤府東南北四十餘城叛附於金帝曰朕懷綏萬邦豈助叛臣爲虐執其使付高麗皓誅位寵奉貢謝恩太子允恭先卒以允恭子原王璟爲右丞相使習知朝政宋金大定二十九年淳熙十六年二崩璟卽位是爲章宗追尊允恭曰顯宗是歲宋孝宗傳位太子在位二十七年孝宗亦南宋賢主

宋人稱其英明雖有報金之志值北方隆盛之運無覺可乘而止然金人易宋之心寢異前時南北講和各治其國生民由此暫得休息孝宗以遠族入繼大統事高宗孝養備至及高宗崩哀慕尤切欲退終喪制乃內禪太子惇卽位是爲光宗尊孝宗爲壽皇聖帝

第七章 宋韓侂胄擅國

光宗皇后李氏驕悍與壽皇忤謂壽皇有廢立意光宗惑之不復朝壽皇又有心疾多不視朝在位五年遭壽皇崩不能執喪知樞密院事趙汝愚密建內禪之議令知閣門事韓侂胄入白太皇太后吳氏侂胄韓琦五世孫而吳后

女弟之子也后垂簾引光宗子嘉王擴入卽位代執孝宗之喪是爲甯宗汝愚薦大儒朱熹召入經筵時侂胄自負有定策功竊弄威柄熹上疏忤侂胄立朝二月而罷侂胄又竄逐汝愚引羣小爲鷹犬搏擊善類無遺籍記汝愚熹等數十人目曰僞學在籍者嚴禁進用侂胄專政十四年以太師平原郡王平章軍國事權傾人主威制上下服御擬於乘輿土木侈於禁苑其嬖妾皆封郡國夫人諛者至稱爲恩王聖相

金章宗初政清明眾賢在朝旣而佞臣嬖妾用事紀綱不修北邊爲卓木布舊作阻鞞等部所擾連年討伐民困財匱國

勢日弱韓侂胄聞之以爲中原可圖聚財募卒命吳璘之

孫曦練兵西蜀開禧二年金泰和六年蒙古太祖元年遂叛盟伐金吳

曦首叛附於金封爲蜀王賴安丙招義徒誅曦僅得保蜀

宋軍北伐皆潰敗而退章宗大發兵連克荆唐州名卽江陵府屬湖北

路今湖北襄兩淮諸郡江南大震三年侂胄悔其前謀遣使通謝求和金人欲罪首禍之臣侂胄聞之怒復銳意用

兵宋人憂懼皇后楊氏密令禮部侍郎史彌遠圖侂胄一

日侂胄入朝彌遠使殿前帥夏震以兵邀途擁去殺之詔

流竄侂胄黨與嘉定元年金泰和八年和議復成改叔姪爲伯

姪增歲幣爲三十萬兩匹犒軍銀三百萬兩函侂胄首獻

之以贖淮南侵地彌遠以功累遷遂爲丞相

第八章 金宋之滅

金章宗無子疏忌宗室以叔父衛王永濟柔弱愛之欲傳位焉在位十九年與宋和之歲崩永濟嗣位時蒙古興於漠北連侵金邊西京留守紇石烈執中棄城遁西北諸州皆降蒙古遼遺族耶律留格舊作耶律留哥叛附於蒙古取遼東州郡山東又盜賊羣起永濟幾不能支且失將士心嘉定六年金至甯元年執中作亂弑永濟迎章宗庶兄昇王珣立之是爲宣宗追廢永濟爲東海郡侯後追復衛王執中爲朮虎高琪所殺

蒙古分兵破兩河山東諸郡所過無不殘滅人民屠戮幾盡金帛子女獸畜皆席卷而去七年金宣宗真祐二年蒙古太祖

還自山東屯燕城北宣宗乞和太祖欲得其公主宣宗以永濟之女及金帛童男女各五百馬三千與之太祖許和而歸宣宗以兵弱財匱不能守中都遷都於汴留平章完顏承暉奉太子守忠守中都太祖聞之怒曰旣和而遷是疑我而不釋憾也遣兵圍燕守忠走汴尋卒八年燕城陷承暉自殺蒙古別軍自河東渡河經京北趨汝州距汴二里而還自是金地勢日蹙西夏叛之山東羣盜益盛金人北保真定東阻河西阻潼關今陝西潼關廳所在而已欲窺宋淮漢

川蜀以自廣宋人自金有外難不輸歲幣宣宗屢督責之不從於是分道南侵宋邊帥趙方等飾兵禦之互有勝敗山東大盜李全率眾降宋號忠義軍宣宗在位十年崩太子守緒立是為哀宗

宋甯宗無子遵高宗故事養太祖十世孫貴和為皇子賜名竑竑慧而輕疾史彌遠專政嘗書几上曰彌遠當決配八千里彌遠聞而惡之日媒孽其失嘉定十七年金哀宗正大元

年蒙古太祖十九年甯宗崩在位三十年彌遠矯詔迎沂靖惠王甯宗從嗣子昀立之昀亦太祖十世孫也是為理宗封竑為濟王出居湖州屬浙西路今湖州府州人作亂欲擁立竑討平之

彌遠遣人逼竑縊之李全叛於淮安軍名即楚州屬淮東路今江蘇淮安府

南向圍揚州幾陷紹定四年金正大八年蒙古太宗三年趙范趙葵兄弟趙方大敗之全走死遂收復淮安

蒙古太宗與太弟圖類舊作拖雷入陝西攻取鳳翔遣使假道於宋以趨河南且請以兵會之宋人殺之圖類進入宋境

屠洋州取興元太宗東破河中府名屬京兆路今山西蒲州府五年金天

年由白坡鎮名在河南懷慶府孟縣西南渡河次鄭州屬南京路今河南其將蘇布特舊作速不台圍汴圖類自金州東馳破金軍於禹

山在河南南陽府鄧州西南又破之於三峰山名在開封府禹州西南進克鈞州屬京路今潼關見上藍田關在禹州潼藍二關名潼關見上藍田關在陝西安府藍田縣東南之戍皆潰哀宗

遣姪曹王鄂和

舊作訛

可為質以請和蘇布特退兵河洛之間

太宗北還既而金人殺蒙古行人和議遂絕蒙古遣王楸

如宋議夾攻金京湖制置使史嵩之

彌遠之姪

以聞宋人皆以

為可遂復讎之舉獨趙范不喜曰宣和海上之盟厥初甚

堅迄以取禍不可不鑑理宗不從詔嵩之遣使報謝蒙古

許俟成功以河南地歸宋

汴京糧盡援絕哀宗出奔河北蘇布特復圍汴六年哀宗

走歸德

府名本宋應天府金改之屬南京路今屬河南

尋走蔡州

屬南京路今河南汝甯府金

將崔立作亂以汴城降蒙古執后妃諸王宗室男女五百

餘人送軍前蘇布特殺梁王從恪

衛紹王之子

等以后妃等北

還在道艱楚萬狀尤甚於徽欽之時哀宗遣使乞糧於宋

諭之曰宋人為謀亦淺矣蒙古滅國四十以及西夏夏亡

及於我我亡必及於宋屠亡齒寒自然之理若與我連和

所以為我者亦為彼也卿其以此意曉之使至宋人不許

蒙古兵圍蔡州史嵩之使孟珙等帥師會之

是歲史彌遠以疾求解政詔褒其勤封會稽郡王越八日

而卒彌遠為相二十六年初欲反韓侂胄所為故收召賢

才老成布於朝廷及濟王不得其死論者紛起遂專任檢

壬以居臺諫一時君子貶斥殆盡理宗德其立已惟言是

從故恩寵終其身理宗始親政勵精求治丞相鄭清之亦

慨然以國家為己任任賢使能擢用真德秀魏了翁等然
蒙古已跨中原勢烈於遼金之初宋人謀與之並立既屬
難事清之等乃遽欲斥攘之安可望其成功哉

端平元年金天興三年金哀宗傳位於宗室承麟孟珙與蒙古

兵入蔡州城哀宗自經死承麟為亂兵所殺金凡九帝太祖

太宗熙宗廢帝亮世宗章宗廢帝承濟宣宗哀宗百二十年而亡趙范趙葵欲乘

時撫定中原建收復三京之議朝臣多以為未可獨鄭清

之力主其說時范為兩淮制置使乃命移司黃州屬淮西路今湖北

黃州刻日進兵范參議官邱岳曰方興之敵新盟而退氣

盛鋒銳甯肯捐所得以與人邪開釁致兵必自此始范不

從知樞密院事喬行簡上疏諫輕舉史嵩之亦言荆襄方

饑未可興師杜杲復陳出師之害理宗皆不聽趙葵全子

才率淮西兵趨汴汴人以城降葵遣將取洛陽蒙古戍者

無幾姑避去宋軍入洛明日食竭聞蒙古且大至皆潰而

歸蒙古遣王檝責宋敗盟自是淮漢之間無甯日矣

理宗無子養弟榮王與芮之子禋立為太子在位四十年

崩太子立是為度宗度宗時蒙古建國號曰元度宗在位

十年崩皇子熈立元世祖命左丞相巴延舊作伯顏帥諸軍伐

宋進入臨安宋人以帝熈降在位二年熈兄益王昀逃至

福州福建福州府為眾所立是為端宗元軍追之端宗航

海西走在位三年崩於碭洲島名在廣東高州府吳川縣南宋遺臣立端

宗弟衛王昺遷於崖山島名在廣東廣州府新會縣南明年宋帝昺祥興二年元世祖

至元十元將張宏範襲之宋兵敗潰帝昺崩於海宋凡十

八年太祖太宗真宗仁宗英宗神宗哲宗徽宗欽宗高宗孝宗光宗甯宗理宗度宗帝昺端宗帝昺三百

二十年而亡

宋自開國以來常以契丹為至憂徽宗幸契丹之衰助金滅之而不慮金之可憂更大於契丹及已與金接壤始悔招強敵自開爭釁以速禍變其後稱臣稱姪受屈辱殆百年宋之君臣唯念世讎之必報而不暇慮後事且若蒙古之實力則南人所未詳悉於是理宗助蒙古滅金取快一

時既而輕舉敗盟挑怒強鄰正與徽宗之失計歸於一轍欲以保邦圖全難矣雖然藝祖本以忠厚建國重以仁宗恭儉愛民自餘諸帝亦莫有嗜殺人者至后妃之賢尤漢唐諸朝之所不及也是以國勢雖衰民謳歌趙氏不忍捨忠臣義士殉國難者甚眾及蒙古代金則廢興之數已定猶能以至弱抗至強支持宗社者四十餘年不似遼金忽焉而亡此乃賴祖宗仁厚之餘澤也

歷代史略卷四
 十四
 此處為書中正文，因文字模糊，內容難以辨識。

